



C40
4514
42



C 40-4574

了翁上座請大藏及有
家書置之武州紫雲山
我徽矣塔院瓦府中未
為學者不敢許出院內
當由一世鐵牛機謹誌



B 64853

南本大般涅槃經卷第十一

北涼天竺三藏曇無讖譯梵

宋沙門慧嚴慧觀同謝靈運再治

聖行品第十九之一

爾時佛告迦葉菩薩善男子菩薩摩訶薩應當於是
大般涅槃經專心思惟五種之行何等為五一者聖
行二者梵行三者天行四者嬰兒行五者病行善男
子菩薩摩訶薩常當修習是五種行復有一行是如
來行所謂大乘大涅槃經迦葉云何菩薩摩訶薩所
修聖行菩薩摩訶薩若從聲聞若從如來得聞如是

大涅槃經聞已生信信已應作如是思惟諸佛世尊
有無上道有大正法大衆正行復有方等大乘經典
我今當爲愛樂貪求大乘經故捨離所愛妻子眷屬
所居舍宅金銀珍寶微妙瓔珞香華妓樂奴僕給使
男女大小象馬車乘牛羊雞犬豬豕之屬復作是念
居家逼迫猶如牢獄一切煩惱由之而生出家閑曠
猶如虛空一切善法因之增長若在家居不得盡壽
淨修梵行我今應當剃除鬚髮出家學道復作是念
我今定當出家修學無上正真菩提之道菩薩如是
欲出家時天魔波旬生大苦惱言是菩薩復當與我

興大戰爭善男子如是菩薩云何當復與人戰爭是
時菩薩卽至僧坊若見如來及佛弟子威儀具足諸
根寂靜其心柔和清淨寂滅卽至其所而求出家剃
除鬚髮服三法衣旣出家已奉持禁戒威儀不缺進
止安庠無所觸犯乃至小罪心生怖畏護戒之心猶
如金剛善男子譬如有人帶持浮囊欲度大海爾時
海中有一羅刹卽從此人乞索浮囊其人聞已卽作
是念我今若與必定沒死答言羅刹汝寧殺我浮囊
叵得羅刹復言汝若不能全與我者見惠其半是人
猶故不肯與之羅刹復言汝若不能惠我半者幸願

經
法華經疏卷十一
二
卷一
與我三分之一是人不肯羅刹復言若不能者施我
手許是人不肯羅刹復言汝今若復不能與我如手
許者我今飢窮衆苦所逼願當濟我如微塵許是人
復言汝今所索誠復不多然我今日方當度海不知
前途近遠云何若與汝者氣當漸出大海之難何由
得過脫能中路没水而死善男子菩薩護持禁戒亦
復如是如彼度人護惜浮囊菩薩如是守護戒時常
有煩惱諸惡羅刹語菩薩言汝當信我終不相欺但
破四禁護持餘戒以是因緣令汝安隱得入涅槃菩
薩爾時應作是言我今寧持如是禁戒墮阿鼻獄終

不毀犯而生天上煩惱羅刹復作是言汝若不能破
四禁者可破僧殘以是因緣令汝安隱得入涅槃菩
薩亦應不隨其語羅刹復言汝若不能犯僧殘者亦
可故犯偷蘭遮罪以是因緣令汝安隱得入涅槃菩
薩爾時亦復不隨羅刹復言汝若不能犯偷蘭遮可
犯捨墮以是因緣可得安隱入於涅槃菩薩爾時亦
復不隨羅刹復言汝若不能犯捨墮者可破波夜提
以是因緣令汝安隱得入涅槃菩薩爾時亦復不隨
羅刹復言汝若不能犯波夜提者幸可毀破突吉羅
戒以是因緣可得安隱入於涅槃菩薩爾時心自念

言我今若犯突吉羅罪不發露者則不能度生死彼岸而得涅槃菩薩摩訶薩於是微小諸戒律中護持堅固心如金剛菩薩摩訶薩持四重禁及突吉羅敬重堅固等無差別菩薩若能如是堅持則爲具足五支諸戒所謂具足菩薩根本業清淨戒前後眷屬餘清淨戒非諸惡覺覺清淨戒護持正念念清淨戒迴向阿耨多羅三藐三菩提戒迦葉是菩薩摩訶薩復有二種戒一者受世教戒二者得正法戒菩薩若得正法戒者終不爲惡受世戒者白四羯磨然後乃得復次善男子有二種戒一者性重戒二者息世譏嫌

戒性重戒者謂四禁也息世譏嫌戒者不作販賣輕稱小斗欺誑於人因他形勢取人財物害心繫縛破壞成功然明而臥田宅種植家業坐肆不畜象馬車乘牛羊駝驢雞犬獼猴孔雀鸚鵡共命及拘枳羅豺狼虎豹貓狸豬豕及餘惡獸童男童女大男大女奴婢僮僕金銀瑠璃玻璃真珠砮磔碼碯珊瑚璧玉珂貝諸寶赤銅白鐵鎗石孟器甌甃甌甃執苴衣一切穀米大小麥豆黍粟稻麻生熟食具常受一食未曾再食若行乞食及僧中食常知足不受別請不食肉不飲酒五辛葷物悉不食之是故其身無有臭

穢常爲諸天一切世人恭敬供養尊重讚歎趣足而食終不長受所受衣服纔足覆身進止常與三衣鉢俱終不捨離如鳥二翼不畜根子莖子節子寔子子子不畜庫藏若金若銀飲食廚庫衣裳服飾高廣大牀象牙金牀雜色編織悉不坐臥不畜一切細軟諸席不坐一切象薦馬薦不以細軟上妙衣裳用敷牀臥其止息牀不置二枕亦不受畜妙好丹枕安簣木枕終不觀視象鬪馬鬪車鬪兵鬪若男若女牛羊雞雉鸚鵡等鬪亦不故往觀視軍陣亦不故聽吹貝鼓角琴瑟箏笛篪篥歌叫妓樂之聲除供養佛檮蒲圍

棋波羅塞戲師子象鬪彈棋六博拍毬擲石投壺牽道八道行成一切戲笑悉不觀作終不占相手足面目不以爪鏡著草楊枝鉢盂髑髏而作卜筮亦不仰觀虛空星宿除欲解睡不作王家往反使命以此語彼以彼語此終不諛諂邪命自活亦不宣說王臣盜賊鬪爭飲食國土饑饉恐怖豐樂安隱之事善男子是名菩薩摩訶薩息世譏嫌戒善男子菩薩摩訶薩堅持如是遮制之戒與性重戒等無差別善男子菩薩摩訶薩受持如是諸禁戒已作是願言寧以此身投於熾然猛火深坑終不毀犯過去未來現在諸佛

經
大智度論卷第十一
五
所制禁戒與刹利婆羅門居士等女而行不淨復次
善男子菩薩摩訶薩復作是願寧以熱鐵周而纏身
終不敢以破戒之身而受信心檀越衣服復次善男
子菩薩摩訶薩復作是願寧以此口吞熱鐵丸終不
敢以毀戒之口而食信心檀越飲食復次善男子菩
薩摩訶薩復作是願寧臥此身大熱鐵上終不敢以
破戒之身受信心檀越牀臥敷具復次善男子菩薩
摩訶薩復作是願寧以此身受三百矛終不敢以毀
戒之身而受信心檀越醫藥復次善男子菩薩摩訶
薩復作是願寧以此身投熱鐵鏝終不敢以破戒之

身受信心檀越房舍屋宅復次善男子菩薩摩訶薩
復作是願寧以鐵椎打碎此身從頭至足令如微塵
不以破戒之身受諸刹利婆羅門居士恭敬禮拜復
次善男子菩薩摩訶薩復作是願寧以熱鐵挑其兩
目不以染心視他好色復次善男子菩薩摩訶薩復
作是願寧以鐵錐周徧刺耳不以染心聽好音聲復
次善男子菩薩摩訶薩復作是願寧以利刀割去其
鼻不以染心貪嗅諸香復次善男子菩薩摩訶薩復
作是願寧以利刀割裂其舌不以染心貪著美味復
次善男子菩薩摩訶薩復作是願寧以利斧斬破其

身不以染心貪著諸觸何以故以是因緣能令行者
墮於地獄畜生餓鬼迦葉是名菩薩摩訶薩護持禁
戒菩薩摩訶薩護持如是諸禁戒已悉以施與一切
衆生以是因緣願令衆生護持禁戒得清淨戒善戒
不缺戒不析戒大乘戒不退戒隨順戒畢竟戒具足
成就波羅蜜戒善男子菩薩摩訶薩修持如是清淨
戒時卽得住於初不動地云何名爲不動地菩薩住
是不動地中不動不墮不退不散善男子譬如須彌
山隨藍猛風不能令動墮落退散菩薩摩訶薩住是
地中亦復如是不爲色聲香味所動不墮地獄畜生

餓鬼不退聲聞辟支佛地不爲異見邪風所散而作
邪命復次善男子又不動者不爲貪欲恚癡所動又
不墮者不墮四重又不退者不退戒還家又不散者
不爲違逆大乘經者之所散壞復次菩薩摩訶薩亦
復不爲諸煩惱魔之所傾動不爲陰魔所墮乃至坐
於道場菩提樹下雖有天魔不能令其退阿耨多羅
三藐三菩提亦復不爲死魔所散善男子是名菩薩
修習聖行善男子云何名爲聖行聖行者佛及菩薩
之所行故故名聖行以何等故名佛菩薩爲聖人耶
如是等人有聖法故常觀諸法性空寂故以是義故

故名聖人有聖戒故故名聖人有聖定慧故故名聖
人有七聖財所謂信戒慚愧多聞智慧捨離故故名
聖人有七聖覺故故名聖人是以是義故復名聖行復
次善男子菩薩摩訶薩聖行者觀察是身從頭至足
其中唯有髮毛爪齒不淨垢穢皮肉筋骨脾胃心肺
肝膽腸胃生熟二臟大小便利涕唾目淚肪膏腦膜
骨髓膿血腦脈諸脉菩薩如是專念觀時誰有是我
我爲屬誰住在何處誰屬於我復作是念骨是我耶
離骨是乎菩薩爾時除去皮肉唯觀白骨復作是念
骨色相異所謂青黃白色鴿色如是骨相亦復非我

何以故我者亦非青黃白色及以鴿色菩薩繫心作
是觀時卽得斷除一切色欲復作是念如是骨者從
因緣生依因足骨以拄踝骨依因踝骨以拄蹲骨依
因蹲骨以拄膝骨依因膝骨以拄胫骨依因胫骨以
拄腕骨依因腕骨以拄腰骨依因腰骨以拄脊骨依
因脊骨以拄肋骨復因脊骨上拄項骨依因項骨以
拄頷骨依因頷骨以拄牙齒上有髑髏復因項骨以
拄肩骨依因肩骨以拄臂骨依因臂骨以拄腕骨依
因腕骨以拄掌骨依因掌骨以拄指骨菩薩摩訶薩
如是觀時身所有骨一切分離得是觀已卽斷三欲

一形貌欲二姿態欲三細觸欲菩薩摩訶薩觀青骨
時見此大地東西南北四維上下悉皆青相如青色
觀黃白鴿色亦復如是菩薩摩訶薩作是觀時眉間
卽出青黃赤白鴿等色光菩薩於是——諸光明中
見有佛像見已卽問如此身者不淨因緣和合共成
云何而得坐起行住屈伸俯仰視瞬喘息悲泣喜笑
此中無主誰使之爾作是問已光中諸佛忽然不現
復作是念或識是我故使諸佛不爲我說復觀此識
次第生滅猶如流水亦復非我復作是念若識非我
出息入息或能是我復作是念此出入息直是風性

而是風性乃是四大四大之中何者是我地性非我
水火風性亦復非我復作是念此身一切悉無有我
唯有心風因緣和合示現種種所作事業譬如呪力
幻術所作亦如箜篌隨意出聲是故此身如是不淨
假衆因緣和合共成當於何處而生貪欲若彼罵辱
復於何處而生嗔恚如我此身三十六物不淨臭穢
何處當有受罵辱者若聞其罵卽便思惟以何音聲
而見罵耶——音聲不能見罵若——不能衆多亦爾
以是義故不應生嗔若他來打亦應思惟如是打者
從何而生復作是念因手刀杖及以我身故得名打

我今何緣橫瞋於他乃是我身自招此咎以我受是
五陰身故譬如因的則有箭中我身亦爾有身有打
我若不忍心則散亂心若散亂則失正念若失正念
則不能觀善不善義若不能觀善不善義則行惡法
惡法因緣則墮地獄畜生餓鬼菩薩爾時作是觀已
得四念處得四念處已則得住於堪忍地中菩薩摩
訶薩住是地已則能堪忍貪欲恚癡亦能堪忍寒熱
飢渴蚊蟲蚤蟲暴風惡觸種種疾疫惡口罵詈撻打
楚撻身心苦惱一切能忍是故名爲住堪忍地迦葉
菩薩白佛言世尊菩薩未得住不動地淨持戒時頗

有因緣得破戒不善男子菩薩未得住不動地有因
緣故可得破戒迦葉言唯然世尊何者是耶佛告迦
葉若有菩薩知以破戒因緣則能令人受持愛樂大
乘經典又能令其讀誦通利書寫經卷廣爲人說不
退轉於阿耨多羅三藐三菩提爲如是故故得破戒
菩薩爾時應作是念我寧一劫若減一劫墮阿鼻地
獄受此罪報要令人不退轉於阿耨多羅三藐三
菩提迦葉以是因緣菩薩摩訶薩得毀淨戒爾時文
殊師利菩薩白佛言世尊若有菩薩攝取護持如是
之人令不退轉菩提之心爲是毀戒若墮阿鼻無有

經 卷一
是處爾時佛讚文殊師利善哉善哉如汝所說我念
往昔於閻浮提作大國王名曰仙豫愛念敬重大乘
經典其心純善無有麤惡嫉妬慳吝口常宣說愛語
善語身常攝護貧窮孤獨布施精進無有休廢時世
無佛聲聞緣覺我於爾時愛樂大乘方等經典十二
年中事婆羅門供給所須過十二年施安已訖卽作
是言師等今應發阿耨多羅三藐三菩提心婆羅門
言大王菩提之性是無所有大乘經典亦復如是大
王云何乃欲令人同於虛空善男子我於爾時心重
大乘聞婆羅門誹謗方等聞已卽時斷其命根善男

子以是因緣從是已來不墮地獄善男子擁護攝持
大乘經典乃有如是無量勢力復次迦葉又有聖行
所謂四聖諦苦集滅道迦葉苦者逼迫相集者能生
長相滅者寂滅相道者大乘相復次善男子苦者現
相集者轉相滅者除相道者能除相復次善男子苦
者有三相苦苦相行苦相壞苦相集者二十五有滅
者滅二十五有道者修戒定慧復次善男子有漏法
者有二種有因有果無漏法者亦有二種有因有果
有漏果者是則名苦苦有漏因者則名爲集無漏果者
則名爲滅無漏因者則名爲道復次善男子八相名

苦所謂生苦老苦病苦死苦愛別離苦怨憎會苦求
不得苦五盛陰苦能生如是八苦法者是名爲集無
有如是八苦之處是名爲滅十力四無所畏三念處
大悲是名爲道善男子生者出相所謂五種一者初
出二者至終三者增長四者出胎五者種類生何等
爲老老有二種一念念老二終身老復有二種一增
長老二滅壞老是名爲老云何爲病病謂四大毒蛇
互不調適亦有二種一者身病二者心病身病有五
一者因水二者因風三者因熱四者雜病五者客病
客病有四一者非分彊作二者忘誤墮落三者刀杖

瓦石四者鬼魅所著心病亦有四種一者踊躍二者
恐怖三者憂愁四者愚癡復次善男子身心之病凡
有三種何等爲三一者業報二者不得遠離惡對三
者時節代謝生如是等因緣名字受分別病因緣者
風等諸病名字者心悶肺脹上氣嗽逆心驚下痢受
分別者頭痛目痛手足等痛是名爲病何等爲死死
者捨所受身捨所受身亦有二種一命盡死二外緣
死命盡死者亦有三種一者命盡非是福盡二者福
盡非是命盡三者福命俱盡外緣死者亦有三種一
者非分自害死二者橫爲他死三者俱死又有三種

死一放逸死二破戒死三壞命根死何等名爲放逸
死若有誹謗大乘方等般若波羅蜜是名放逸死何
等名爲破戒死毀犯去來現在諸佛所制禁戒是名
破戒死何等名爲壞命根死捨五陰身是名壞命根
死如是名曰死爲大苦何等名爲愛別離苦所愛之
物破壞離散所愛之物破壞離散亦有二種一者人
中五陰壞二者天中五陰壞如是人天所受五陰分
別校計有無量種是名愛別離苦何等名爲怨憎會
苦所不愛者而共聚集所不愛者而共聚集亦有三
種所謂地獄餓鬼畜生如是三趣分別校計有無量

種如是則名怨憎會苦何等名爲求不得苦求不得
苦亦有二種一者所希望處求不能得二者多用功
力不得果報如是則名求不得苦何等名爲五盛陰
苦五盛陰苦者生苦苦老苦病苦苦死苦愛別離苦怨憎
會苦求不得苦是故名爲五盛陰苦迦葉生之根本
凡有如是七種之苦老苦乃至五盛陰苦迦葉夫衰
老者非一切有佛及諸天一向定無人中不定或有
或無迦葉三界受身無不有生老不必定是故一切
生爲根本迦葉世間衆生顛倒覆心貪著生相厭患
老死菩薩不爾觀於初生已見過患迦葉如有女人

入於他舍是女端正顏貌美麗以好瓔珞莊嚴其身
主人見已卽便問言汝字何等繫屬於誰女人答言
我身卽是功德大天主人問言汝所至處爲何所作
女人答言我所至處能與種種金銀瑠璃玻瓈真珠
珊瑚琥珀碑礫碼碯象馬車乘奴婢僕使主人聞已
心生歡喜踊躍無量我今福德故令汝來至我舍宅
卽便燒香散華供養恭敬禮拜復於門外更見一女
其形醜陋衣裳敝壞多諸垢膩皮膚皴裂其色艾白
見已問言汝字何等繫屬於誰女人答言我字黑闇
復問何故名爲黑闇女人答言我所行處能令其家

所有財寶一切衰耗主人聞已卽持利刀作如是言
汝若不去當斷汝命女人答言汝甚愚癡無有智慧
主人問言何故名我癡無智慧女人答言汝家中者
卽是我姊我常與姊進止共俱汝若驅我亦當驅彼
主人還入問功德天外有一女云是汝妹實爲是不
功德天言實是我妹我與此妹行住共俱未曾相離
隨所住處我常作好彼當作惡我作利益彼作衰損
若愛我者亦應愛彼若見恭敬亦應敬彼主人卽言
若有如是好惡事者我皆不用各隨意去是時二女
便共相將還其所止爾時主人見其還去心生歡喜

踊躍無量是時二女復共相隨至一貧家貧人見已
心生歡喜卽請之言從今已往願汝二人常住我家
功德天言我等先以爲他所驅汝復何緣俱請我住
貧人答言汝今念我我以汝故復當敬彼是故俱請
令住我家迦葉菩薩摩訶薩亦復如是不願生天以
生當有老病死故是以俱弃曾無受心凡夫愚人不知
老病死等過患是故貪受生死二法復次迦葉如
婆羅門幼稚童子爲飢所逼見人糞中有菴羅果卽
便取之有智見已訶責之言汝婆羅門種姓清淨何
故取是糞中穢果童子聞已赧然有愧卽答之言我

實不食爲欲洗淨還弃捨之智者語言汝大愚癡若
還弃者本不應取善男子菩薩摩訶薩亦復如是於
此生分不受不捨如彼智者訶責童子凡夫之人欣
生惡死如彼童子取果還弃復次迦葉譬如有人四
衢道頭器盛滿食色香味具而欲賣之有人遠來飢
虛羸乏見其飯食色香味具卽指問言此是何物食
主答言此是上食色香味具若食此食得色得力能
除飢渴得見諸天唯有一患所謂命終是人聞已卽
作是念我今不用色力見天亦不用死卽作是言食
是食已若命終者汝今何爲於此賣之食主答言有

智之人終不肯買唯有愚人不知是事多與我價貪而食之善男子菩薩摩訶薩亦復如是不願生天得色得力見於諸天何以故以其不免諸苦惱故凡夫愚癡隨有生處皆悉貪愛以其不見老病死故復次迦葉譬如毒樹根能殺人枝幹莖節皮葉華實悉亦能殺善男子二十五有受生之處所受五陰亦復如是一切能殺復次迦葉譬如糞穢多少俱臭善男子生亦如是設受八萬下至十歲俱亦受苦復次迦葉譬如險岸上有草覆於彼岸邊多有甘露若有食者壽命千年永除諸病安隱快樂凡夫愚人貪其味故

不知其下有大深坑卽前欲取不覺脚踏墮坑而死智者知已捨離遠去善男子菩薩摩訶薩亦復如是尚不欲受天上妙食況復人中凡夫之人乃於地獄吞啖鐵丸況復人天上妙餚饌而能不食迦葉以如是譬及餘無量無邊譬喻當知是生實爲大苦迦葉是名菩薩住於大乘大涅槃經觀於生苦迦葉云何菩薩於是大乘大涅槃經觀於老苦老者能爲嗽逆上氣能壞勇力憶念進持盛年快樂憍慢貢高安隱自恣能作背僕懈怠懶惰爲他所輕迦葉譬如池水蓮華滿中開敷鮮榮甚可愛樂值天降雹悉皆破壞

善男子老亦如是悉能破壞盛壯好色復次迦葉譬如國王有一智臣善知兵法有敵國王拒逆不順王遣此臣往討伐之即便擒獲將來詣王老亦如是擒獲壯色將付死王復次迦葉譬如折軸無所復用老亦如是無所復用復次迦葉如大富家多有財寶金銀瑠璃珊瑚琥珀碑礫碼礪有諸怨賊若入其家卽能劫奪悉令空盡善男子盛年好色亦復如是常爲老賊之所劫奪復次迦葉譬如貧人貪著上磨細軟衣裳雖復希望而不能得善男子老亦如是雖有貪心欲受富樂五欲自恣而不能得復次迦葉如陸地

龜心常念水善男子人亦如是旣爲衰老之所乾枯心常憶念壯時所受五欲之樂復次迦葉猶如秋月所有蓮華皆爲一切之所愛見及其萎黃人所惡賤善男子盛年壯色亦復如是悉爲一切之所愛樂及其老至衆所惡賤復次迦葉譬如甘蔗旣被壓已滓無復味壯年盛色亦復如是旣被老壓無三種味一出家味二讀誦味三坐禪味復次迦葉譬如滿月夜多光明晝則不爾善男子人亦如是壯則端嚴形貌瓌偉老則衰羸形神枯悴復次迦葉譬如王常以正法治國理民直實無曲慈憫好施時爲敵國之所

破壞流離逃迸遠至他土他土人民見而憫之咸作
是言大王往日正法治國不枉萬姓如何一旦流離
至此善男子人亦如是既爲衰老所壞敗已常讚壯
時所行事業復次迦葉譬如燈炷唯賴膏油膏油既
盡勢不久停善男子人亦如是唯賴壯膏壯膏既盡
衰老之炷何得久停復次迦葉譬如枯河不能利益
人及非人飛鳥走獸善男子人亦如是爲老所枯不
能利益一切作業復次迦葉譬如河岸臨險之樹若
遇暴風必當顛墜善男子人亦如是臨老險岸死風
既至勢不得住復次迦葉如車軸折不任重載善男

子老亦如是不能容受一切善法復次迦葉譬如嬰
兒爲人所輕善男子老亦如是常爲一切之所輕毀
迦葉以是等譬及餘無量無邊譬喻當知是老實爲
大苦迦葉是名菩薩修行大乘大涅槃經觀於老苦
迦葉云何菩薩摩訶薩修行大乘大涅槃經觀於病
苦所謂病者能壞一切安隱樂事譬如雹雨傷壞穀
苗復次迦葉如人有怨心常憂愁而懷恐怖善男子
一切衆生亦復如是常畏病苦心懷憂感復次迦葉
譬如有人形貌端正爲王夫人欲心所愛遣信逼呼
與共交通時王收得挑其一目截其一耳斷一手足

是人爾時形容改異人所惡賤善男子人亦如是先
雖端嚴耳目具足既爲病苦所纏逼已則爲衆人之
所惡賤復次迦葉譬如芭蕉竹葦及騾有子則死善
男子人亦如是有病則死復次迦葉如轉輪王主兵
大臣常在前導王隨後行亦如魚王璽王螺王牛王
商王在前行時如是諸衆悉皆隨從無捨離者善男
子死轉輪王亦復如是常隨病臣不相捨離魚璽螺
牛商主病王亦復如是常爲死衆之所隨逐迦葉病
因緣者所謂苦惱憂愁悲歎身心不安或爲怨賊之
所逼害破壞浮囊發徹橋梁亦能劫奪正命根本復

能破壞盛壯好色力勢安樂除捨慙愧能爲身心焦
熱熾然以是等譬及餘無量無邊譬喻當知病苦是
爲大苦迦葉是名菩薩摩訶薩修行大乘大涅槃經
觀於病苦迦葉云何菩薩修行大乘大涅槃經觀於
死苦所謂死者能燒滅故迦葉如火災起能燒一切
唯除二禪力不至故善男子死火亦爾能燒一切唯
除菩薩住於大乘大般涅槃勢不及故復次迦葉如
水災起一切漂沒唯除三禪力不至故善男子死水
亦爾漂沒一切唯除菩薩住於大乘大般涅槃復次
迦葉如風災起能吹一切悉令散滅唯除四禪力不

至故善男子死風亦爾悉能吹滅一切所有唯除菩薩住於大乘大般涅槃迦葉菩薩白佛言世尊彼第四禪以何因緣風不能吹水不能漂火不能燒佛告迦葉善男子彼第四禪內外過患一切無故善男子初禪過患內有覺觀外有火災二禪過患內有歡喜外有水災三禪過患內有喘息外有風災善男子彼第四禪內外過患一切悉無是故諸災不能及之善男子菩薩摩訶薩亦復如是安住大乘大般涅槃內外過患一切皆盡是故死王不能及之復次善男子如金翅鳥能啖能消一切龍魚金銀等寶唯除金剛

不能令消善男子死金翅鳥亦復如是能啖能消一切衆生唯不能消住於大乘大般涅槃菩薩摩訶薩復次迦葉譬如河岸所有草木大水暴長悉隨漂流入於大海唯除楊柳以其輒故善男子一切衆生亦復如是悉皆隨流人于死海唯除菩薩住於大乘大般涅槃復次迦葉如黑羅延悉能摧伏一切力士唯除大風何以故以無礙故善男子死那羅延亦復如是悉能摧伏一切衆生唯除菩薩住於大乘大般涅槃何以故以無礙故復次迦葉譬如有人於怨憎中詐現親善常相追逐逐如影隨形伺求其便而欲殺之

彼怨謹慎堅牢自備故使是人不能得殺善男子死
怨亦爾常伺衆生而欲殺之唯不能殺住於大乘大
般涅槃菩薩摩訶薩何以故以是菩薩不放逸故復
次迦葉譬如卒降金剛暴雨悉壞藥木諸樹山林土
沙瓦石金銀瑠璃一切之物唯不能壞金剛真實善
男子金剛死雨亦復如是悉能破壞一切衆生唯除
金剛菩薩住於大乘大般涅槃復次迦葉如金翅鳥
能啖諸龍唯不能啖受三歸者善男子死金翅鳥亦
復如是能啖一切無量衆生唯除菩薩住三定者何
謂三定空無相願復次迦葉如摩羅毒蛇凡有所螫

雖有良呪上妙好藥無如之何唯阿竭多星呪能令
除愈善男子死毒所螫亦復如是一切醫方無如之
何唯除菩薩住於大乘大涅槃呪復次迦葉譬如有人
爲王所瞋其人若能以軟善語貢上財寶便可得
脫善男子死王不爾雖以軟語錢財珍寶而貢上之
亦不得脫善男子夫死者於險難處無有資糧去處
懸遠而無伴侶晝夜常行不知邊際深邃幽闇無有
燈明入無門戶而有處所雖無痛處不可療治往無
遮止到不得脫無所破壞見者愁毒非是惡色而令
人怖敷在身邊不可覺知迦葉以是等譬及餘無量

無邊譬喻當知生死真爲大苦迦葉是名菩薩修行
大乘大涅槃經觀於死苦迦葉云何菩薩住於大乘
大涅槃經觀愛別離苦愛別離苦能爲一切衆苦根
本如說因愛生憂因愛生畏若離貪愛何憂何畏愛
因緣故則生憂苦以憂苦故則令衆生生於衰老愛
別離苦所謂命終善男子以別離故能生種種微細
諸苦今當爲汝分別顯示善男子過去之世人壽無
量時世有王名曰善住其王爾時爲童子身太子治
事及登王位各八萬四千歲時王頂上生一肉炮其
炮柔軟如兜羅絲細軟劫貝漸漸增長不以爲患足

滿十月炮卽開剖生一童子其形端正奇異少雙色
像分明人中第一父王歡喜字曰頂生時善住王卽
以國事委付頂生棄捨宮殿妻子眷屬入山學道滿
八萬四千歲爾時頂生於十五日處在高樓沐浴受
齋卽於東方有金輪寶其輪千輻轂輞具足不由工
匠自然成就而來應之頂生大王卽作是念我昔曾
聞五通仙說若剎利王於十五日處在高樓沐浴受
齋若有金輪千輻不減轂輞具足不由工匠自然成
就而來應者當知是王卽當得作轉輪聖帝復作是
念我今當試卽以左手擎此輪寶右執香爐右膝著

地而發誓言是金輪寶若實不虛應如過去轉輪聖王所行道法作是誓已是金輪寶飛升虛空徧十方已還來住在頂生左手爾時頂生心生歡喜踊躍無量復作是言我今定作轉輪聖王其後不久復有象寶狀貌端嚴如白蓮華七支拄地頂生見已復作是念我昔曾聞五通仙說若轉輪王於十五日處在高樓沐浴受齋若有象寶狀貌端嚴如白蓮華七支拄地而來應者當知是王卽是聖帝復作是念我今當試卽擎香爐右膝著地而發誓言是白象寶若實不虛應如過去轉輪聖王所行道法作是誓已是白象

寶從旦至夕周徧八方盡大海際還住本處爾時頂生心大歡喜踊躍無量復作是言我今定是轉輪聖王其後不久次有馬寶其色紺豔髦尾金色頂生見已復作是念我昔曾聞五通仙說若轉輪王於十五日處在高樓沐浴受齋若有馬寶其色紺豔髦尾金色而來應者當知是王卽是聖帝復作是念我今當試卽執香爐右膝著地而發誓言是紺馬寶若實不虛應如過去轉輪聖王所行道法作是誓已是紺馬寶從旦至夕周徧八方盡大海際還住本處爾時頂生心大歡喜踊躍無量復作是言我今定是轉輪聖

王其後不久復有女寶形容端正微妙第一不長不短不白不黑身諸毛孔出梅檀香口氣香潔如青蓮華其目遠視見一由旬耳聞鼻嗅亦復如是其舌廣大出能覆面形色細薄如赤銅鑠心識聰哲有大智慧於諸衆生常有軟語是女以手觸王衣時卽知王身安樂病患亦知王心所緣之處爾時頂生復作是念若有女人能知王心卽是女寶其後不久於王宮內自然而有寶摩尼珠純青瑠璃大如車轂能於闇中照一由旬若天降雨滂如車軸是珠勢力能作大蓋覆一由旬遮此大雨不令下過爾時頂生復作是

念若轉輪王得是寶珠必是聖帝其後不久有王藏臣自然而出多饒財寶巨富無量庫藏盈溢無所乏少報得眼根力能徹見一切地中所有伏藏隨王所念皆能辨之爾時頂生復欲試之卽共乘船入於大海告藏臣言我今欲得珍異之寶藏臣聞已卽以兩手撓大海水時十指頭出十寶藏以奉聖王而白王言大王所須隨意用之其餘在者當投大海爾時頂生心大歡喜踊躍無量復作念言我今定是轉輪聖王其後不久有王兵臣自然而出勇健猛略策謀第一善知四兵若任闔者則現聖王若不任者退不令

現未摧伏者能令摧伏已摧伏者力能守護爾時頂
生復作是念若轉輪王得是七寶當知定是轉輪聖
王爾時頂生轉輪聖帝告諸大臣汝等當知此閻浮
提安隱豐樂我今已有七寶成就千子具足更何所
爲諸臣答言唯然大王東弗婆提猶未歸德王今應
往爾時聖王卽與七寶一切營從飛空而往東弗婆
提彼土人民歡喜歸化復告大臣我閻浮提及弗婆
提安隱豐樂人民熾盛悉來歸化七寶成就千子具
足復何所爲諸臣答言唯然大王西瞿陀尼猶未歸
德爾時聖王復與七寶一切營從飛空而往西瞿陀

尼王旣至彼彼土人民亦復歸伏復告大臣我閻浮
提及弗婆提此瞿陀尼安隱豐樂人民熾盛咸已歸
化七寶成就千子具足復何所爲諸臣答言唯然大
王北鬱單越猶未歸化爾時聖王復與七寶一切營
從飛空而往北鬱單越王旣至彼彼土人民歡喜歸
德復告大臣我四天下安隱豐樂人民熾盛咸已歸
德七寶成就千子具足更何所爲諸臣答言唯然聖
王三十三天壽命極長安隱快樂彼天身形端嚴無
比所居宮殿牀榻臥具悉是七寶自恃天福未來歸
化今應往討令其摧伏爾時聖王復與七寶一切營

從飛騰虛空上忉利天見有一樹其色青綠聖王見已卽問大臣此是何色大臣答言此是波利質多羅樹忉利諸天夏三月時常於其下娛樂受樂又見白色猶如白雲復問大臣彼是何色大臣答言是善法堂忉利諸天常集其中論人天事於是天主釋提桓因知頂生王已來在外卽出迎逆見已執手升善法堂分座而坐彼時二王形容相貌等無差別唯有視眴爲別異耳是時聖王卽生念言我今寧可退彼王位卽住其中爲天王不善男子爾時帝釋受持讀誦大乘經典開示分別爲他演說唯於深義未盡通達

以是讀誦受持分別爲他廣說因緣力故有大威德善男子是頂生王於此帝釋生惡心已卽便墮落還閻浮提與所愛念人天離別生大苦惱復遇惡病卽便命終爾時帝釋迦葉佛是轉輪聖王則我身是善男子當知如是愛別離者極爲大苦善男子菩薩摩訶薩尚憶過去如是等輩愛別離苦何況菩薩住於大乘大涅槃經而當不觀現在之世愛別離苦善男子云何菩薩修行大乘大涅槃經觀怨憎會苦善男子是菩薩摩訶薩觀於地獄畜生餓鬼人中天上皆有如是怨憎會苦譬如人觀牢獄繫閉枷鎖杻械以

爲大苦菩薩摩訶薩亦復如是觀於五道一切受生
悉是怨憎合會大苦復次善男子譬如有人常畏恐
家枷鎖杻械捨離父母妻子眷屬珍寶產業而遠逃
避善男子菩薩摩訶薩亦復如是畏怖生死具足修
行六波羅蜜入於涅槃迦葉是名菩薩修行大乘大
般涅槃觀怨憎會苦善男子云何菩薩修行大乘大
般涅槃觀求不得苦求者一切盡求盡求者有二種
一求善法二求不善法善法未得苦惡法未離苦是
爲略說五盛陰苦迦葉是名苦諦爾時迦葉菩薩摩
訶薩白佛言世尊如佛所說五盛陰苦是義不然何

以故如佛往昔告釋摩男若色苦者一切衆生不應
求色若有求者則不名苦如佛告諸比丘有三種受
苦受樂受不苦不樂受如佛先爲諸比丘說若有人
能修行善法則得受樂又如佛說於善道中六觸受
樂眼見好色是則爲樂耳鼻舌身意思好法亦復如
是如佛說偈

持戒則爲樂 身不受衆苦 睡眠得安隱

寤則心歡喜 若受衣食時 誦習而經行

獨處於山林 如是爲最樂 若能於衆生

晝夜常修慈 因是得常樂 以不惱他故

少欲知足樂 多聞分別樂 無著阿羅漢

亦名爲受樂 菩薩摩訶薩 畢竟到彼岸

所作衆事辦 是名爲最樂

世尊如諸經中所說樂相其義如是如佛今說云何當與此義相應佛告迦葉善哉善哉善男子善能咨問如來是義善男子一切衆生於下苦中橫生樂想是故我今所說苦相與本不異迦葉菩薩白佛言如佛所說於下苦中生樂想者下生下老下病下死下愛別離下求不得下怨憎會下五盛陰如是等苦亦應有樂世尊下生者所謂三惡趣中生者所謂人中

上生者所謂天上若復有人作如是問若於下樂生於苦想於中樂中生無苦樂想於上樂中生於樂想當云何答世尊若下苦中生樂想者未見有人當受千罰初一下時已生樂想若不生者云何說言於下苦中而生樂想佛告迦葉如是如是如汝所說以是義故無有樂想何以故猶如彼人當受千罰受一下已卽得脫者是人爾時便生樂想是故當知於無樂中妄生樂想迦葉言世尊彼人不一下生於樂想以得脫故而生樂想迦葉是故我昔爲釋摩男說五陰中樂實不虛也迦葉有三受三苦三受者所謂樂

受苦受不苦不樂受三苦者所謂苦苦行苦壞苦善
男子苦受者名爲三苦所謂苦苦行苦壞苦餘二受
者所謂行苦壞苦善男子以是因緣生死之中實有
樂受菩薩摩訶薩以苦樂性不相捨離是故說言一
切皆苦善男子生死之中實無有樂但諸佛菩薩隨
順世間說言有樂迦葉菩薩白佛言世尊諸佛菩薩
若隨俗說是虛妄不如佛所說修行善者則受樂報
持戒安樂身不受苦乃至衆事已辦是爲最樂如是
等經所說樂受是虛妄不若是虛妄諸佛世尊久於
無量百千萬億阿僧祇劫修菩提道已離妄語今作

是說其義云何佛言善男子如上所說諸受樂偈卽
是菩提道之根本亦能長養阿耨多羅三藐三菩提
以是義故先於經中說是樂相善男子譬如世間所
須資生能爲樂因故名爲樂所謂女色耽湏飲酒上
饌甘味渴時得水寒時遇火衣服纓絡象馬車乘奴
婢僮僕金銀琉璃珊瑚真珠倉庫穀米如是等物世
間所須能爲樂因是名爲樂善男子如是等物亦能
生苦因於女人人生男子苦憂愁悲泣乃至斷命因酒
甘味乃至倉庫亦能令人人生大憂惱以是義故一切
皆苦無有樂相善男子菩薩摩訶薩於是入苦解苦

012345678920012345678921012345678922

經

大般涅槃經卷十一

二十六

在

無苦善男子一切聲聞辟支佛等不知樂因為如是人於下苦中說有樂相唯有菩薩住於大乘大般涅槃乃能知是苦因樂因

南本大般涅槃經卷第十一

音釋

拘枳羅

梵語也此云好毘

也

毘

吐蓋切毘

毘

其俱切毘

也

毘

細都切毘

毘

徒毘

也

毘

房時切毘

毘

胡瓦切毘

也

毘

骨也毘

毘

兩旁毘

也

毘

骨也毘

毘

兩旁毘

也

毘

骨也毘

毘

兩旁毘

南本大般涅槃經卷第十二

北涼天竺三藏曇無讖譯梵

宋沙門慧嚴慧觀同謝靈運再治

聖行品第十九之二

善男子云何菩薩摩訶薩住於大乘大般涅槃觀察集諦善男子菩薩摩訶薩觀此集諦是陰因緣所謂集者還愛於有愛有二種一愛已身二愛所須復有二種未得五欲繫心專求既求得已堪忍專著復有三種欲愛色愛無色愛復有三種業因緣愛煩惱因緣愛苦因緣愛出家之人有四種愛何等為四衣服

福建福寧州福安縣尹丹陽實學易施資刻 南本大般涅槃經卷十一計字一萬二千九百二十該銀六兩一錢新安知淨對長洲徐普書上癸季煇刻 善唐甲寅歲夏四月化城識

經
大船海經卷十二
飲食臥具湯藥復有五種貪著五陰隨諸所須一切
愛著分別校計無量無邊善男子愛有二種一者善
愛二不善愛不善愛者凡愚之求善法愛者諸菩薩
求善法愛者復有二種不善與善求二乘者名爲不
善求大乘者是名爲善善男子凡夫愛者名之爲集
不名爲諦菩薩愛者名之實諦不名爲集何以故爲
度衆生所以受生不以愛故而受生也迦葉菩薩白
佛言世尊如佛世尊於餘經中爲諸衆生說業爲因
緣或說憍慢或說六觸或說無明爲五盛陰而作因
緣今以何義說四聖諦獨以愛性爲五陰因佛讚迦

葉善哉善哉善男子如汝所說諸因緣者非爲非因
但是五陰要因於愛善男子譬如大王若出遊巡大
臣眷屬悉皆隨從愛亦如是隨愛行處是諸結等亦
復隨行譬如膩衣隨有塵著著則隨住愛亦如是隨
所愛處業結亦住復次善男子譬如濕地則能生牙
愛亦如是能生一切業煩惱牙善男子菩薩摩訶薩
住是大乘大般涅槃深觀此愛凡有九種一如責有
餘二如羅刹女婦三如妙華莖有毒蛇四如惡食性
所不便而強食之五如姪女六如摩樓迦子七如瘡
中瘰肉八如暴風九如彗星云何名爲如責有餘善

男子譬如窮人負他錢財雖償欲畢餘未畢故猶繫在獄而不得脫聲聞緣覺亦復如是以有愛習之餘氣故不能得成阿耨多羅三藐三菩提善男子是名如責有餘善男子云何如羅刹女婦善男子譬如有人得羅刹女納以爲婦是羅刹女隨所生子生已便食食子既盡復食其夫善男子愛羅刹女亦復如是隨諸衆生生善根子隨生隨食善子既盡復食衆生令墮地獄畜生餓鬼唯除菩薩是名如羅刹女婦善男子云何如妙華莖毒蛇纏之譬如有人性愛好華不見華莖毒蛇過患即便前捉捉已蛇螫螫已命終

一切凡夫亦復如是貪五欲華不見是愛毒蛇過患而便受取卽爲愛蛇之所毒螫命終卽墮三惡道中唯除菩薩是名如妙華莖毒蛇纏之善男子云何所不便食而強食之譬如有人所不便食而強食之食已腹痛患下而死愛食如是五道衆生強食貪著以是因緣墮三惡道唯除菩薩是名所不便食而強食之善男子云何如姪女譬如愚人與姪女通而彼姪女巧作種種諂媚現親悉奪是人所有錢財錢財既盡便復驅逐愛之姪女亦復如是愚人無智與之交通而是愛女奪其所有一切善法善法既盡驅逐令

經
三惡道中唯除菩薩是名如姪女善男子云何如
摩樓迦子譬如摩樓迦子若鳥食已隨糞墮地或因
風吹來在樹下即便生長纏繞縛束尼拘羅樹令不
增長遂至枯死愛摩樓迦子亦復如是纏縛凡夫所
有善法不令增長遂至枯滅既枯滅已命終之後墮
三惡道唯除菩薩是名如摩樓迦子善男子云何如
瘡中瘕肉如人久瘡中生瘕肉其人要當勤心療治
莫生捨心若生捨心瘕肉增長蟲疽復生以是因緣
即便命終凡夫愚人五陰瘡瘻亦復如是愛於其中
而爲瘕肉應當勤心治愛瘕肉若不治者命終卽墮

三惡道中唯除菩薩是名如瘡中瘕肉善男子云何
如暴風譬如暴風能偃山夷嶽拔於深根愛欲暴風
亦復如是於父母所而生惡心能拔大智舍利弗等
無上深固菩提根本唯除菩薩是名如暴風善男子
云何如彗星譬如彗星出現天下一切人民饑饉病
瘦嬰諸苦惱愛之彗星亦復如是能斷一切善根種
子令凡夫人孤窮饑饉生煩惱病流轉生死受種種
苦唯除菩薩是名如彗星善男子菩薩摩訶薩住於
大乘大般涅槃觀察愛結如是九種善男子以是義
故諸凡夫人有苦無諦聲聞緣覺有苦有苦諦而無

眞實諸菩薩等解苦無苦是故無苦而有眞諦諸凡
夫人有集無諦聲聞緣覺有集有集諦諸菩薩等解
集無集是故無集而有眞諦聲聞緣覺有滅非眞菩
薩摩訶薩有滅有眞諦聲聞緣覺有道非眞菩薩摩
訶薩有道有眞諦善男子云何菩薩摩訶薩住於大
乘大乘涅槃見滅見滅諦所謂斷除一切煩惱若煩
惱斷則名爲常滅煩惱火則名寂滅煩惱滅故則得
受樂諸佛菩薩求因緣故故名爲淨更不復受二十
五有故名出世以出世故故名爲我常於色聲香味
觸等若男若女若生住滅若苦若樂不苦不樂不取

相貌故名畢竟寂滅眞諦善男子菩薩如是住於大
乘大乘涅槃觀滅聖諦善男子云何菩薩摩訶薩住
於大乘大乘涅槃觀道聖諦善男子譬如闇中因燈
得見麤細之物菩薩摩訶薩亦復如是住於大乘大
般涅槃因八聖道見一切法所謂常無常有爲無爲
有衆生非衆生物非物苦樂我無我淨不淨煩惱非
煩惱業非業實不實乘非乘知無知陀羅驃非陀羅
驃求那非求那見非見色非色道非道解非解善男
子菩薩如是住於大乘大乘涅槃觀道聖諦迦葉菩
薩白佛言世尊若八聖道是道聖諦義不相應何以

故如來或說信心爲道能度諸漏或時說道不放逸
是諸佛世尊不放逸故得阿耨多羅三藐三菩提亦
是菩薩助道之法或時說言精進是道如告阿難若
有人能勤修精進則得成就阿耨多羅三藐三菩提
或時說言觀身念處若有繫心精勤修習是身念處
則得成就阿耨多羅三藐三菩提或時說言正定爲
道如告大德摩訶迦葉夫正定者真實是道非不正
定而是道也若入禪定乃能思惟五陰生滅非不入
定能思惟也或說一法若人修習能淨衆生滅除一
切憂愁苦惱逮得正法所謂念佛三昧或復說言修

無常想是名爲道如告比丘有能多修無常想者能
得阿耨多羅三藐三菩提或說空寂阿蘭若處獨坐
思惟能得速成阿耨多羅三藐三菩提或時說言爲
人演法是名爲道若聞法已疑網卽斷疑網斷已則
得阿耨多羅三藐三菩提或時說言持戒是道如告
阿難若有精勤修持禁戒是人則度生死大苦或時
說言親近善友是名爲道如告阿難若有親近善知
識者則具淨戒若有衆生能親近我則得發於阿耨
多羅三藐三菩提心或時說言修慈是道修學慈者
斷諸煩惱得不動處或時說言智慧是道如佛昔爲

波闍波提比丘尼說姊妹如諸聲聞以智慧刀能斷諸流諸漏煩惱或時如來說施是道如佛往昔告波斯匿王大王當知我於往昔多行惠施以是因緣今日得成阿耨多羅三藐三菩提世尊若八聖道是道諦者如是等經豈非虛妄若彼諸經非虛妄者彼中何緣不說八道爲道聖諦若彼不說如來往昔何故錯謬然我定知諸佛如來久離錯謬爾時世尊讚迦葉菩薩善哉善哉善男子汝今欲知菩薩大乘微妙經典所有祕密故作是問善男子如是諸經悉入道諦善男子如我先說若有信道如是信道是信根本

是能佐助菩提之道是故我說無有錯謬善男子如來善知無量方便欲化衆生故作如是種種說法善男子譬如良醫識諸衆生種種病源隨其所患而爲合藥并藥所禁唯水一種不在禁例或服薑水或甘草水或細辛水或黑石蜜水或阿摩勒水或尼婆羅水或鉢畫羅水或服冷水或服熱水或蒲萄水或安石榴水善男子如是良醫善知衆生所患種種藥雖多禁水不在例如來亦爾善知方便於一法相隨諸衆生分別廣說種種名相彼諸衆生隨所說受受已修習除斷煩惱如彼病人隨良醫教所患得除復次

善男子如有一人善解衆語在大衆中是諸大衆熱渴所偏咸發聲音我欲飲水我欲飲水是人卽時以清冷水隨其種類說言是水或言波尼或言鬱持或言紫利藍或言婆利或言波耶或言甘露或言牛乳以如是等無量水名爲大衆說善男子如來亦爾以一聖道爲諸聲聞種種演說從信根等至八聖道復次善男子譬如金師以一種金隨意造作種種瓔珞所謂鉗鎖環釧釵璫天冠臂印雖有如是差別不同然不離金善男子如來亦爾以一佛道隨諸衆生種種分別而爲說之或說一種所謂諸佛一道無二復

說二種所謂定慧復說三種謂見慧智復說四種所謂見道修道無學道佛道復說五種所謂信行道法行道信解脫道見到道身證道復說六種所謂須陀洹道斯陀含道阿那含道阿羅漢道辟支佛道佛道復說七種所謂念覺分擇法覺分精進覺分喜覺分除覺分定覺分捨覺分復說八種所謂正見正思惟正語正業正命正精進正念正定復說九種所謂八道及信復說十種所謂十力復說十一種所謂十力大慈復說十二種所謂十力大慈大悲復說十三種所謂十力大慈大悲念佛三昧復說十六種所謂十

力大慈大悲念佛三昧及佛所得三正念處復說二十道所謂十力四無所畏大悲念佛三昧三正念處善男子是道一體如來昔日爲衆生故種種分別復次善男子譬如一火因所然故得種種名所謂木火草火糠火麩火牛馬糞火善男子佛道亦爾一而無二爲衆生故種種分別復次善男子譬如一識分別說六若至於眼則名眼識乃至意識亦復如是善男子道亦如是一而無二如來爲化諸衆生故種種分別復次善男子譬如一色眼所見者則名爲色耳所聞者則名爲聲鼻所嗅者則名爲香舌所嘗者

則名爲味身所覺者則名爲觸善男子道亦如是一而無二如來爲欲化衆生故種種分別善男子以是義故以八聖道分名道聖諦善男子是四聖諦諸佛世尊次第說之以是因緣無量衆生得度生死迦葉白佛言世尊昔佛一時在恒河岸尸首林中爾時如來取少樹葉告諸比丘我今手中所捉葉多一切因地草木葉多諸比丘言世尊一切因地草木葉多不可稱計如來所捉少不足言諸比丘我所覺了一切諸法如因大地生草木等爲諸衆生所宣說者如手中葉世尊爾時說如是言如來所了無量諸法若入

四諦則爲已說若不入者應有五諦佛讚迦葉善哉善哉善男子汝今所問則能利益安隱快樂無量衆生善男子如是諸法悉已攝在四聖諦中迦葉菩薩復曰佛言如是等法若在四諦如來何故唱言不說佛言善男子雖復入中猶不名說何以故善男子知聖諦有二種智一者中二者上中者聲聞緣覺上者諸佛菩薩善男子知諸陰苦名爲中智分別諸陰有無量相悉是諸苦非是聲聞緣覺所知是名上智善男子如是等義我於彼經竟不說之善男子知諸入者名之爲門亦名爲苦是名中智分別諸入有無量

相悉是諸苦非諸聲聞緣覺所知是名上智如是等義我於彼經亦不說之善男子知諸界者名之爲分亦名爲性亦名爲苦是名中智分別諸界有無量相悉是諸苦非諸聲聞緣覺所知是名上智善男子如是等義我於彼經亦不說之善男子知色壞相是名中智分別諸色有無量壞相悉是諸苦非諸聲聞緣覺所知是名上智如是等義我於彼經亦不說之善男子知受覺相是名中智分別諸受有無量覺相非諸聲聞緣覺所知是名上智善男子如是等義我於彼經亦不說之善男子知想取相是名中智分別是

想有無量取相非諸聲聞緣覺所知是名上智如是等義我於彼經亦不說之善男子知行作相是名中智分別是行無量作相非諸聲聞緣覺所知是名上智善男子如是等義我於彼經亦不說之善男子知識分別相是名中智分別是識無量知相非諸聲聞緣覺所知是名上智善男子如是等義我於彼經亦不說之善男子知愛因緣能生五陰是名中智一人起愛無量無邊聲聞緣覺所不能知能知一切衆生所起如是等愛是名上智如是等義我於彼經亦不說之善男子知滅煩惱是名中智分別煩惱不可稱

計滅亦如是不可稱計非諸聲聞緣覺所知是名上智如是等義我於彼經亦不說之善男子知是道相能離煩惱是名中智分別道相無量無邊所離煩惱亦無量無邊非諸聲聞緣覺所知是名上智如是等義我於彼經亦不說之善男子知世諦者是名中智分別世諦無量無邊不可稱計非諸聲聞緣覺所知是名上智如是等義我於彼經亦不說之善男子知一切行無常諸法無我涅槃寂滅是第一義是名中智知第一義無量無邊不可稱計非諸聲聞緣覺所知是名上智如是等義我於彼經亦不說之爾時文

殊師利菩薩白佛言世尊所說世諦第一義諦其義云何世尊第一義中有世諦不世諦之中有第一義不如其有者卽是一諦如其無者將非如來虛妄說耶善男子世諦者卽第一義諦世尊若爾者則無二諦佛言善男子有善方便隨順衆生說有二諦善男子若隨言說則有二種一者世法二者出世法善男子如出世人之所知者名第一義諦世人知者名爲世諦善男子五陰和合稱言某甲凡夫衆生隨其所稱是名世諦解陰無有某甲名字離陰亦無某甲名字出世之人如其性相而能知名第一義諦復次

善男子或有法有名有實或復有法有名無實善男子有名無實者卽是世諦有名有實者是第一義諦善男子如我衆生壽命知見養育丈夫作者受者熱時之燄乾闥婆城龜毛兔角旋火之輪諸陰界入是名世諦苦集滅道名第一義諦善男子世法有五種一者名世二者句世三者縛世四者法世五者執著世善男子云何名世男女瓶衣車乘屋舍如是等物是名名世云何句世四句一偈如是等偈是名句世云何縛世捲合繫結束縛合掌是名縛世云何法世如鳴椎集僧嚴鼓戒兵吹貝知時是名法世云何執

著世如望遠人有染衣者生想執著言是沙門非婆羅門見有結繩橫佩身上便生念言是婆羅門非沙門也是名執著世善男子如是名爲五種世法善男子若有衆生於如是等五種世法心無顛倒如實而知是名第一義諦復次善男子若燒若割若死若壞是名世諦無燒無割無死無壞是名第一義諦復次善男子有八苦相名爲世諦無生無老無病無死無愛別離無怨憎會無求不得無五盛陰是名第一義諦復次善男子譬如一人多有所能若其走時則名走者若收刈時復名刈者若作飲食名作食者若治

材木則名工匠鍛金銀時言金銀師如是一人有多名字法亦如是其實是一而有多名依因父母和合而生名爲世諦十二因緣和合生者名第一義諦文殊師利菩薩白佛言世尊所言實諦其義云何佛言善男子言實諦者名曰眞法善男子若法非眞不名實諦善男子實諦者無顛倒無顛倒者乃名實諦善男子實諦者無有虛妄若有虛妄不名實諦善男子實諦者名曰大乘非大乘者不名實諦善男子實諦者是佛所說非魔所說若是魔說非佛說者不名實諦善男子實諦者一道清淨無有二也善男子有常

有樂有我。有淨。是則名爲實諦之義。文殊師利白佛言。世尊。若以眞實爲實諦者。眞實之法。卽是如來虛空佛性。若如是者。如來虛空及與佛性。無有差別。佛告文殊師利。有苦有諦。有實有集。有諦有實。有滅有諦。有實有道。有諦有實。善男子。如來非苦。非謗。是實虛空。非苦。非諦。是實佛性。非苦。非諦。是實文殊師利所言。苦者爲無常相。是可斷相。是爲實諦。如來之性。非苦。非無常。非可斷相。是故爲實虛空佛性。亦復如是。復次善男子。所言集者。能令五陰和合而生。亦名爲苦。亦名爲常。是可斷相。是爲實諦。善男子。如來非

是集性。非是陰。因非可斷相。是故爲實虛空佛性。亦復如是。善男子。所言滅者。名煩惱滅。亦常無常。二乘所得。名曰無常。諸佛所得。是則名常。亦名證法。是爲實諦。善男子。如來之性。不名爲滅。能滅煩惱。非常無常。不名證法。常住無變。是故爲實虛空佛性。亦復如是。善男子。道者。能斷煩惱。亦常無常。是可修法。是爲實諦。如來非道。能斷煩惱。非常無常。非可修法。常住不變。是故爲實虛空佛性。亦復如是。復次善男子。言眞實者。卽是如來。如來者。卽是眞實。眞實者。卽是虛空。虛空者。卽是眞實。眞實者。卽是佛性。佛性者。卽是

眞實文殊師利有苦有苦因有苦盡有苦對如來非苦乃至非對是故爲實不名爲諦虛空佛性亦復如是苦者有爲有漏無樂如來非有爲非有漏湛然安樂是實非諦文殊師利白佛言世尊如佛所說不顛倒者名爲實諦若爾者四諦之中有四倒不如其有者云何說言無有顛倒名爲實諦一切顛倒不名爲實佛告文殊師利一切顛倒皆入苦諦如諸衆生有顛倒心名爲顛倒善男子譬如有人不受父母尊長教勅雖受不能隨順修行如是人等名爲顛倒如是顛倒非不是苦即是苦也文殊師利言如佛所說不

虛妄者即是實諦若爾者當知虛妄則非實諦佛言善男子一切虛妄皆入苦諦如有衆生欺誑於他以是因緣墮於地獄畜生餓鬼如是等法名爲虛妄如是虛妄非不是苦即是苦也聲聞緣覺諸佛世尊遠離不行故名虛妄如是虛妄諸佛二乘所斷除故故名實諦文殊師利言如佛所說大乘是實諦者當知聲聞辟支佛乘則爲不實佛言文殊師利彼二乘者亦實不實聲聞緣覺斷諸煩惱則名爲實無常不住是變易法名爲不實文殊師利言如佛所說若佛所說名爲實者當知魔說則爲不實世尊如魔所說聖

諦攝不佛言文殊師利魔所說者二諦所攝所謂苦
集凡是一切非法非律不能令人而得利益終日宣
說亦無有人見苦斷集證滅修道是名虛妄如是虛
妄名爲魔說文殊師利言如佛所說一道清淨無有
二者諸外道等亦復說言我有一道清淨無二若言
一道是實諦者與彼外道有何差別若無差別不應
說言一道清淨佛言善男子諸外道等有苦集諦無
滅道諦於非滅中而生滅想於非道中而生道想於
非果中而生果想於非因中而生因想以是義故彼
無一道清淨無二文殊師利言如佛所說有常有我

有樂有淨是實義者諸外道等應有實諦佛法中無
何以故諸外道輩亦復說言諸行是常云何是常可
意不可意諸業報等受不失故可意者名十善報不
可意者十不善報若言諸行皆悉無常而作業者於
此已滅誰復於彼受果報乎以是義故諸行是常殺
生因緣故名爲常世尊若言諸行悉無常者能殺可
殺二俱無常若無常者誰於地獄而受罪報若言定
有地獄受報當知諸行實非無常世尊繫心專念亦
名爲常所謂十年所念乃至百年亦不忘失是故爲
常若無常者本所見事誰憶誰念以是因緣一切諸

行非無常也世尊一切憶想亦名爲常有人先見他人手足頭項等相後時若見便還識之若無常者本相應滅世尊諸所作業以久修習若從初學或經三年或經五年然後善知故名爲常世尊等數之法從一至二從二至三乃至百千若無常者初一應滅初一若滅誰復至二如是常一終無有二以一不滅故得至二乃至百千是故爲常世尊如讀誦法誦一阿舍至二阿舍乃至三四阿舍如其無常所可讀誦終不至四以是讀誦增長因緣故名爲常世尊瓶衣車乘如人負責大地形相山河樹林藥木草葉衆生治

病皆悉是常亦復如是世尊一切外道皆作是說諸行是常若是常者卽是實諦世尊有諸外道復言有樂云何知耶受者定得可意報故世尊凡受樂者必定得之所謂大梵天王大自在天釋提桓因毗紐天及諸人天以是義故必定有樂世尊有諸外道復言有樂能令衆生生求望故飢者求食渴者求飲寒者求溫熱者求涼極者求息病者求差欲者求色若無樂者彼何緣求以有求故故知有樂世尊有諸外道復作是言施能得樂世間之人好施沙門諸婆羅門貧窮困苦衣服飲食臥具醫藥象馬車乘栴檀香

衆華屋宅依止燈明作如是等種種惠施爲我後世受可意報是故當知決定有樂世尊有諸外道復作是言以因緣故當知有樂所謂受樂者有因緣故名爲樂觸若無樂者何得因緣如無兔角則無因緣有樂因緣則知有樂世尊有諸外道復作是言上中下故當知有樂下受樂者釋提桓因中受樂者大梵天王上受樂者大自在天以有如是上中下故當知有樂世尊有諸外道復言有淨何以故若無淨者不應起欲若起欲者當知有淨又復說言金銀珍寶瑠璃玻瓈磚礫碼瑙珊瑚真珠璧玉珂貝流泉浴池飲食

衣服華香林香塗香燈燭之明如是等物悉是淨法復次有淨謂五陰者卽是淨器盛諸淨物所謂人天諸仙阿羅漢辟支佛菩薩諸佛以是義故名之爲淨世尊有諸外道復言有我有所觀見能造作故譬如有人入陶師家雖復不見陶師之身以見輪繩定知其家必是陶師我亦如是眼見色已必知有我若無我者誰能見色聞聲乃至觸法亦復如是復次有我云何得知因相故知何等爲相喘息視眴壽命役心受諸苦樂貪求瞋恚如是等法悉是我相是故當知必定有我復次有我別味故有人食果見已知味

是故當知必定有我復次有我云何知耶執作業故
執鎌能刈執斧能斫執瓶盛水執車能御如是等事
我執能作是故當知必定有我復次有我云何知耶
卽於生時欲得乳哺乘宿習故以是當知必定有我
復次有我云何知耶和合利益他衆生故譬如瓶衣
車乘田宅山林樹木象馬牛羊如是等物若和合者
則有利益此內五陰亦復如是眼等諸根有和合故
則利益我是故當知必定有我復次有我云何知耶
有遮法故如有物故則有遮闕物若無者則無有遮
若有遮者則知有我我是故當知必定有我復次有我

云何知耶伴非伴故親與非親非是伴侶正法邪法
亦非伴侶智與非智亦非伴侶沙門非沙門婆羅門
非婆羅門子非子晝非晝夜非夜我非我如是等法
爲伴非伴是故當知必定有我世尊諸外道等種種
說有常樂我淨當知定有常樂我淨世尊以是義故
諸外道等亦得說言我有真諦佛言善男子若有沙
門婆羅門有常有樂有我有淨者是非沙門非婆羅
門何以故迷於生死離一切智大導師故如是沙門
婆羅門等沉沒諸欲善法羸損故是諸外道繫在貪
欲瞋恚癡獄堪忍愛樂故是諸外道雖知業果自作

自受而猶不能遠離惡法是諸外道非是正法正命
自活何以故無智慧火不能消故是諸外道雖欲貪
著上妙五欲貧於善法不勤修故是諸外道雖欲往
至正解脫中而持戒足不成就故是諸外道雖欲求
樂而不能求樂因緣故是諸外道雖復憎惡一切諸
苦然其所行未能遠離諸苦因緣是諸外道雖爲四
大毒蛇所纏猶行放逸不能謹慎是諸外道無明所
覆遠離善友樂在三界無常熾然大火之中而不能
出是諸外道遇諸煩惱難愈之病而復不求大智良
醫是諸外道方於未來當涉無邊險遠之路而不知

以善法資糧而自莊嚴是諸外道常爲姪欲災毒所
害而反抱持五欲霜毒是諸外道瞋恚熾盛而復反
更親近惡友是諸外道常爲無明之所覆蔽而反推
求邪惡之法是諸外道常爲邪見之所誑惑而反於
中生親善想是諸外道希食甘果而種苦子是諸外
道已處煩惱闇室之中而反遠離大智炬明是諸外
道患煩惱渴而復又飲諸欲鹹水是諸外道漂沒生
死無邊大河而復遠離無上船師是諸外道迷惑諸
倒言諸行常諸行若常無有是處

南本大般涅槃經卷第十二

音釋

瘰

思力切瘡也 彗 徐醉切瘡力瘳切 疽 七余切 驃 毗切

環釧

環戶關切 釧 尺絹切 釵 楚皆切 釵 與職切 釵 制也

切割也

鍛

丁貫切

鎌

力鹽切

福建福寧州福安縣尹丹陽賀學易施資刻此南本大般涅槃經第十二卷計字八千一百五十七該銀四兩二錢四分武林釋如德對長洲徐普旌德劉邦承刻萬曆甲寅歲春三月徑山化城識

南本大般涅槃經卷第十三

北涼天竺三藏曇無讖譯梵

宋沙門慧嚴慧觀同謝靈運再治

聖行品第十九之三

善男子我觀諸行悉皆無常云何知耶以因緣故若有諸法從緣生者則知無常是諸外道無有一法不從緣生善男子佛性無生無滅無去無來非過去非未來非現在非因所作非無因作非作非作者非相非無相非有名非無名非名非色非長非短非陰界入之所攝持是故名常善男子佛性卽是如來如來

卽是法法卽是常善男子常者卽是如來如來卽是
僧僧卽是常以是義故從因生法不名爲常是諸外
道無有一法不從因生善男子是諸外道不見佛性
如來及法是故外道所可言說悉是妄語無有真諦
諸凡夫人先見瓶衣車乘舍宅城郭河水山林男女
象馬牛羊後見相似便言是常當知其實非是常也
善男子一切有爲皆是無常虛空無爲是故爲常佛
性無爲是故爲常虛空者卽是佛性佛性者卽是如
來如來者卽是無爲無爲者卽是常常者卽是法法
者卽是僧僧卽無爲無爲者卽是常善男子有爲之

法凡有二種色法非色法非色法者心心數法色法
者地水火風善男子心名無常何以故性是攀緣相
應分別故善男子眼識性異乃至意識性異是故無
常善男子色境界異乃至法境界異是故無常善男
子眼識相應異乃至意識相應異是故無常善男子
心若常者眼識應獨緣一切法善男子若眼識異乃
至意識異則知無常以法相似念念生滅凡夫見已
計之爲常善男子諸因緣相可破壞故亦名無常所
謂因眼因色因明因思惟生於眼識耳識生時所因
各異非眼識因緣乃至意識異亦如是復次善男子

壞諸行因緣故心名無常所謂修無常心異修苦空
無我心異心若常者應常修無常尚不得觀苦空無
我況復得觀常樂淨我以是義故外道法中不能攝
取常樂淨我善男子當知心法必定無常復次善男
子心性異故名爲無常所謂聲聞心性異緣覺心性
異諸佛心性異一切外道心有三種一者出家心二
者在家心三者在家遠離心樂相應心異苦相應心
異不苦不樂相應心異貪欲相應心異瞋恚相應心
異愚癡相應心異一切外道心相亦異所謂愚癡相
應心異疑惑相應心異邪見相應心異進止威儀其

心亦異善男子心若常者亦復不能分別諸色所謂
青黃赤白紫色善男子心若常者諸憶念法不應忘
失善男子心若常者凡所讀誦不應增長復次善男
子心若常者不應說言已作今作當作若有已作今
作當作當知是心必定無常善男子心若常者則無
怨親非怨非親心若常者則不應言我物他物若死
若生心若常者雖有所作不應增長善男子以是義
故當知心性各各別異有別異故當知無常善男子
我今於此非色法中演說無常其義已顯復當爲汝
說色無常是色無常本無有生生已滅故內身處胎

歌羅邏時本無有生生已變故外之牙莖本亦無生
生已變故是故當知一切色法悉皆無常善男子所
有內色隨時而變歌羅邏時異安浮陀時異伽那時
異閉手時異諸胞時異初生時異嬰孩時異童子時
異乃至老時各各變異所謂外色亦復如是芽異莖
異枝異葉異華異果異復次善男子內味亦異歌羅
邏時乃至老時各各變異外味亦爾芽莖枝葉華果
味異歌羅邏時力異乃至老時力異歌羅邏時狀貌
異乃至老時狀貌亦異歌羅邏時果報異乃至老時
果報亦異歌羅邏時名字異乃至老時名字亦異所

謂內色壞已還合故知無常外之樹木亦壞已還合
故知無常次第漸生故知無常次第生歌羅邏時乃
至老時次第生牙乃至果子故知無常諸色可滅故
知無常歌羅邏滅時異乃至老滅時異芽滅時異乃
至果滅時異故知無常凡夫無知見相似生計以爲
常以是義故名曰無常若無常卽是苦苦卽是不
淨善男子我因迦葉上問是事於彼已答復次善男
子諸行無我善男子總一切法謂色非色色非我也
何以故可破可壞可打可裂生增長故我者不可破
壞打裂生長以是義故知色非我非色之法亦復非

我何以故因緣生故善男子若諸外道以專念故知
有我者專念之性實非我也若以專念爲我性者過
去之事則有忘失有忘失故定知無我善男子若諸
外道以憶想故知有我者無憶想故定知無我如說
見人手有六指卽復問言我先何處共相見耶若有
我者不應復問以相問故定知無我善男子若諸外
道以遮故知有我者善男子以有遮故定知無我如
言調達終不發言非調達也我亦如是若定是我終
不遮我以遮我故定知無我若以遮故知有我者汝
今不遮定應無我善男子若諸外道以伴非伴知有

我者以無伴故應無有我無法無伴所謂如來虛空
佛性我亦如是實無有伴以是義故定知無我復次
善男子若諸外道以名字故知有我者無我法中亦
有我名如貧賤人名字富貴如言我死若我死者我
則殺我而我實不可殺假名殺我亦如姓人名爲長
者以是義故定知無我復次善男子若諸外道以生
已求乳知有我者善男子若有我者一切嬰兒不應
執持不淨火蛇毒藥以是義故定知無我復次善男
子一切衆生於三法中悉有等智所謂婬欲飲食恐
怖是故無我復次善男子若諸外道以相貌故知有

我者善男子相故無我無相故亦無我若人睡時不能進止俯仰視眴不覺苦樂不應有我若以進止俯仰視眴知有我者機關木人亦應有我善男子如來亦爾不進不止不俯不仰不視不眴不苦不樂不貪不恚不癡不行如來如是真實有我復次善男子若諸外道以見他食果口中生涎知有我者善男子以憶念故見則生涎涎非我也我亦非涎非喜非悲非哭非笑非懂非起非飢非飽以是義故定知無我善男子是諸外道癡如小兒無慧方便不能了達常與無常苦樂淨不淨我無我壽命非壽命衆生非衆生

實非實有非有於佛法中取少許分虛妄計有常樂淨我而實不知常樂淨我如生盲人不能識乳色便問他言乳色何似他人答言色白如具盲人復問是乳色者如貝聲耶答言不也復問貝色為何似耶答言如稻米糝盲人復問乳色柔輒如稻米糝耶稻米糝者復何所似答言如雪盲人復言彼稻米糝冷如雪耶雪復何似答言猶如白鶴是生盲人雖聞如是種種譬喻終不能得識乳真色是諸外道亦復如是終不能識常樂淨我善男子以是義故我佛法中有真實諦非於外道文殊師利白佛言希有世尊如來於

今臨般若涅槃方復更轉無上法輪乃作如是分別真諦佛告文殊師利汝今云何故於如來生涅槃想善男子如來實是常住不變不般涅槃善男子若有計我是佛我成阿耨多羅三藐三菩提我即是法法是我所我即是道道是我所我即世尊世尊即是我所我即聲聞聲聞即是我所我能說法令他聽受我轉法輪餘人不能如來終不作如是計是故如來不轉法輪善男子若有人作如是妄計我即是眼眼即是我所耳鼻舌身意亦復如是我即是色色是我所乃至法亦如是我即是地地即我所水火風亦如是善

男子若人計言我即是信信是我所我是多聞多聞即是我所我是檀波羅蜜檀波羅蜜即是我所我是尸波羅蜜尸波羅蜜即是我所我是羸提波羅蜜羸提波羅蜜即是我所我是毗梨耶波羅蜜毗梨耶波羅蜜即是我所我是禪波羅蜜禪波羅蜜即是我所我是般若波羅蜜般若波羅蜜即是我所我是四念處四念處即是我所四正勤四如意足五根五力七覺分八聖道分亦復如是善男子如來終不作如是計是故如來不轉法輪善男子若言常住無有變易云何說言佛轉法輪是故汝今不應說言如來方更

轉上法輪善男子譬如因眼緣色緣明緣思惟因緣
和合得生眼識善男子眼不念言我能生識色乃至
思惟終不念言我生眼識眼識亦復不作念言我能
自生善男子如是等法因緣和合得名爲見善男子
如來亦爾因六波羅蜜和合得名爲見善男子如來
亦爾因六波羅蜜三十七助菩提法覺了諸法復因
咽喉舌齒脣口言語音聲爲憍陳如初始說法名轉
法輪以是義故如來不名轉法輪也善男子若不轉
者卽名爲法法卽如來善男子譬如因燧因鑽因手
因乾秋草而得生火燧亦不言我能生火鑽手乾草

各不念言我能生火火亦不言我能自生如來亦爾
因六波羅蜜乃至憍陳如名轉法輪如來亦復不生
念言我轉法輪善男子若不生者是則名爲轉正法
輪是轉法輪卽名如來善男子譬如因酪因水因鑽
因瓶因繩因人手捉而得出酥酪不念言我能出酥
乃至人手亦不念言我能出酥酥亦不言我能自出
衆緣和合故得出酥如來亦爾終不念言我轉法輪
善男子若不出者是則名爲轉正法輪是轉法輪卽
是如來善男子譬如因子及地水火風沃壤時節因
人作業而牙得生善男子子亦不言我能生牙乃至

作業亦不念言我能生牙牙亦不言我能自生如來亦爾終不念言我轉法輪善男子若不作者是則名為轉正法輪是轉法輪卽是如來善男子譬如因鼓因空因皮因人因桴和合出聲鼓不念言我能出聲乃至桴亦如是聲亦不言我能自生善男子如來亦爾終不念言我轉法輪善男子轉法輪者名為不作不作者卽轉法輪轉法輪者卽是如來善男子轉法輪者乃是諸佛世尊境界非諸聲聞緣覺所知善男子虛空非生非出非作非造非有爲法如來亦爾非生非出非作非造非有爲法如來性佛性亦爾非

生非出非作非造非有爲法善男子諸佛世尊語有二種一者世語二者出世語善男子如來爲諸聲聞緣覺說於世語爲諸菩薩說出世語善男子是諸大衆復有二種一者求小乘二者求大乘我於昔日波羅柰城爲諸聲聞轉于法輪今始於此拘尸那城爲諸菩薩轉大法輪復次善男子復有二人中根上根爲中根人於波羅柰轉於法輪爲上根人人中象王迦葉菩薩等今於此間拘尸那城轉大法輪善男子極下根者如來終不爲轉法輪極下根者卽一闍提復次善男子求佛道者復有二種一中精進二上精

進於波羅柰爲中精進轉於法輪今於此城爲上精
進轉大法輪復次善男子我昔於彼波羅柰城初轉
法輪八萬天人得須陀洹果今於此城八十萬億人
不退轉於阿耨多羅三藐三菩提復次善男子波羅
柰城大梵天王稽首請我轉於法輪今於此城迦葉
菩薩稽首請我轉大法輪復次善男子我昔於彼波
羅柰城轉法輪時演說無常苦空無我今於此城轉
法輪時如實演暢常樂我淨復次善男子我昔於彼
波羅柰城轉法輪時所出音聲聞于梵天如來今於
拘尸那城轉法輪時所出音聲徧于東方二十恒河

沙等諸佛世界南西北方四維上下亦復如是復次
善男子諸佛世尊凡有所說皆悉名爲轉法輪也善
男子譬如聖王所有輪寶未降伏者能令降伏已降
伏者能令安隱善男子諸佛世尊凡所說法亦復如
是無量煩惱未調伏者能令調伏已調伏者令生善
根善男子譬如聖王所有輪寶則能消滅一切怨賊
如來演法亦復如是能令一切諸煩惱賊皆悉寂靜
復次善男子譬如聖王所有輪寶下上迴轉如來說
法亦復如是能令下趣諸惡衆生上生人天乃至佛
道善男子是故汝今不應讚言如來於此更轉法輪

爾時文殊師利白佛言世尊我於此義非爲不知所
以問者爲欲利益諸衆生故世尊我已久知轉法輪
者實是諸佛如來境界非是聲聞緣覺所及爾時世
尊告迦葉菩薩善男子是名菩薩住於大乘大涅槃
經所行聖行迦葉菩薩白佛言世尊復以何義名爲
聖行善男子聖名諸佛世尊以是義故名爲聖行世
尊若是諸佛之所行者則非聲聞緣覺菩薩所能修
行善男子是諸世尊安住於此大般涅槃而作如是
開示分別演說其義以是義故名曰聖行聲聞緣覺
及諸菩薩如是聞已則能奉行故名聖行善男子是

菩薩摩訶薩得是行已則得住於無所畏地善男子
若有菩薩得住如是無所畏地則不復畏貪恚愚癡
生老病死亦復不畏惡道地獄畜生餓鬼善男子惡
有二種一者阿脩羅二者人中人中有三種惡一者
一闍提二者誹謗方等經典三者犯四重禁善男子
住是地中諸菩薩等終不畏墮如是惡中亦復不畏
沙門婆羅門外道邪見天魔波旬亦復不畏受二十
五有是故此地名無所畏善男子菩薩摩訶薩住無
畏地得二十五三昧壞二十五有善男子得無垢三
昧能壞地獄有得無退三昧能壞畜生有得心樂三

昧能壞餓鬼有得歡喜三昧能壞阿脩羅有得日光
三昧能斷弗婆提有得月光三昧能斷瞿耶尼有得
熱燄三昧能斷鬱單越有得如幻三昧能斷閻浮提
有得一切法不動三昧能斷四天處有得難伏三昧
能斷三十三天處有得悅意三昧能斷燄摩天有得
青色三昧能斷兜術天有得黃色三昧能斷化樂天
有得赤色三昧能斷他化自在天有得白色三昧能
斷初禪有得種種三昧能斷大梵王有得雙三昧能
斷二禪有得雷音三昧能斷三禪有得注雨三昧能
斷四禪有得如虛空三昧能斷無想有得照鏡三昧

能斷淨居阿那含有得無閔三昧能斷空處有得常
三昧能斷識處有得樂三昧能斷不用處有得我三
昧能斷非想非非想處有善男子是名菩薩得二十
五三昧斷二十五有善男子如是二十五三昧名諸
三昧王善男子菩薩摩訶薩入如是等諸三昧王若
欲吹壞須彌山王隨意卽能欲知三千大千世界所
有衆生心之所念亦悉能知欲以三千大千世界所
有衆生肉於己身一毛孔中隨意卽能亦令衆生無
迫迮想若欲化作無量衆生悉令充滿三千大千世
界中者亦能隨意能分一身以爲多身復合多身以

爲一身雖作如是心無所著猶如蓮華善男子菩薩
摩訶薩得入如是三昧王已卽得住於自在地菩
薩住是自在地者得自在力隨欲生處卽得住生善
男子譬如聖王領四天下隨意所行無能障闕菩薩
摩訶薩亦復如是一切生處若欲生者隨意往生善
男子菩薩摩訶薩若見地獄一切衆生有可化令住
善根者菩薩卽時往生其中菩薩雖生非本業果善
薩摩訶薩雖在地獄不受熾然碎身等苦善男子菩
薩摩訶薩所可成就如是功德無量無邊百千萬億

尚不可說何況諸佛所有功德而當可說爾時衆中
有一菩薩名住無垢藏王有大威德成就神通得大
總持三昧具足得無所畏卽從座起偏袒右肩右膝
著地長跪合掌白佛言世尊如佛所說諸佛菩薩所
可成就功德智慧無量無邊百千萬億實不可說我
意猶謂故不如是大乘經典何以故因是大乘方等
經力故能出生諸佛世尊阿耨多羅三藐三菩提時
佛讚言善哉善哉善男子如是如是如汝所說是諸
大乘方等經典雖復成就無量功德欲比是經不得
爲喻百倍千倍百千萬倍乃至算數譬喻所不能及

善男子譬如從牛出乳從乳出酪從酪出生酥從生酥出熟酥從熟酥出醍醐醍醐最上若有服者衆病皆除所有諸藥悉入其中善男子佛亦如是從佛出十二部經從十二部經出修多羅從修多羅出方等經從方等經出般若波羅蜜從般若波羅蜜出大涅槃猶如醍醐言醍醐者喻於佛性佛性者卽是如來善男子以是義故說言如來所有功德無量無邊不可稱計迦葉菩薩白佛言世尊如佛所讚大涅槃經猶如醍醐最上最妙若有能服衆病悉除一切諸藥悉入其中我聞是已竊復思念若有不能聽受是經

當知是人爲大愚癡無有善心世尊我於今者實能堪忍剝皮爲紙刺血爲墨以髓爲水析骨爲筆書寫如是大涅槃經書已讀誦令其通利然後爲人廣說其義世尊若有衆生貪著財物我當施財然後以是大涅槃經勸之令讀若尊貴者先以愛語隨順其意然後漸當以是大乘大涅槃經勸之令讀若凡庶者當以威勢偈之令讀若憍慢者爲作僕使隨順其意令其歡喜然後復以大涅槃經而教導之若有誹謗方等經者當以勢力摧之令伏旣摧伏已然後勸令讀大涅槃若有愛樂大乘經者我當躬往恭敬供養

經
六度集經卷十三
十四
在十三
尊重讚歎爾時佛讚迦葉菩薩善哉善哉汝甚愛樂
大乘經典貪大乘經愛大乘經味大乘經信敬尊重
供養大乘善男子汝今以此善心因緣當得超越無
量無邊恒河沙等大菩薩前成阿耨多羅三藐三菩
提汝亦不久復當如我廣爲大衆演說如是大般涅槃
如來佛性諸佛所說祕密之藏善男子乃昔過去
佛日未出我於爾時作婆羅門修菩薩行悉能通達
一切外道所有經論修寂滅行具足威儀其心清淨
不爲外來能生欲想之所破壞滅瞋恚火受持常樂
我淨之法周徧求索大乘經典乃至不聞方等名字

我於爾時住於雪山其山清淨流泉浴池樹林藥木
充滿其地處處石間有清流水多諸香華周徧嚴飾
衆鳥羣獸不可稱計甘果滋繁種別難計復有無量
藕根甘根青木香根我於爾時獨處其中唯食諸果
食已繫心思惟坐禪經無量歲亦不聞有如來出世
大乘經名善男子我修如是難行苦行時彼帝釋諸
天人等心大驚怪卽共集會各各相謂而說偈言

各各相指示

清淨雪山中

寂靜離欲主

功德莊嚴王

已離貪瞋慢

永斷諂愚癡

口初未曾說

麤惡等語言

爾時衆中有一天子名曰歡喜復說偈言

如是離欲人 清淨勤精進 將不求帝釋

及以諸天耶 若是求道者 修行諸苦行

是人多欲求 帝釋所坐處

爾時復有一仙子卽爲帝釋而說偈言

天王憍尸迦 不應生是慮 外道修苦行

何必求帝處

說是偈已復作是言憍尸迦世有大士爲衆生故不貪已身爲欲利益諸衆生故而修種種無量苦行如是之人見生死中諸過咎故設見珍寶滿此大地諸

山大海不生貪著如視涕唾如是大士弃捨財寶所愛妻子頭目髓腦手足支節所居舍宅象馬車乘奴婢童僕亦不願求生於天上唯願一切得受快樂如我所解如是大士清淨無染衆結永盡唯欲志求阿耨多羅三藐三菩提釋提桓因復作是言如汝言者是人則爲攝取一切世間衆生大仙若此世間有佛樹者能除一切梵天世人及阿脩羅煩惱毒蛇若諸衆生住是佛樹陰涼中者煩惱諸毒悉得消滅大仙人若當未來世中作善逝者我等悉當得滅無量熾然煩惱如是之事實爲難信何以故無量衆生發

阿耨多羅三藐三菩提心見少微緣於阿耨多羅三藐三菩提即便動轉如水中月水動則動猶如畫像難成易壞菩提之心亦復如是難發易壞大仙如有多人以諸鎧仗牢自莊嚴欲前討賊臨陣恐怖則便退散無量衆生亦復如是發菩提心牢自莊嚴見生死過心生恐怖即便退散大仙我見如是無量衆生發心之後皆生動轉是故我今雖見是人專修苦行無惱無熱住於道檢其行清淨未能信也我今要當自往試之知其實能堪任荷負阿耨多羅三藐三菩提大重擔不大仙猶如車有二輪則有載用鳥有二

翼堪任飛行是苦行者亦復如是我雖見其堅持禁戒未知其人有深智不若有深智當知則能堪任荷負阿耨多羅三藐三菩提之重擔也大仙譬如魚母多有胎子成就者鮮如菴羅樹華多果少衆生發心乃有無量及其成就少不足言大仙我當與汝俱往試之大仙譬如真金三種試已乃知其真謂燒打磨試彼苦行亦當如是爾時釋提桓因自變其身作羅刹像形甚可畏下至雪山去其不遠而便立住是時羅刹心無所畏勇健難當辯才次第其聲清雅宣過去佛所說半偈

諸行無常 是生滅法

說是半偈已便住其前所現形貌甚可怖畏顧眄徧
視觀於四方是苦行者聞是半偈心生歡喜譬如賈
客於險難處夜行失伴恐怖推索還遇同侶心生歡
喜踊躍無量亦如久病未遇良醫瞻病好藥後卒得
之如人沒海卒遇船舫如渴乏人遇清冷水如爲怨
逐忽然得脫如久繫獄卒聞得出亦如農夫炎旱得
雨亦如行人還得歸家家人見已生大歡喜善男子
我於爾時聞是半偈心中歡喜亦復如是卽從座起
以手舉髮四向顧視而作是語向所聞偈誰之所說

爾時四顧不見餘人唯見羅刹卽說是言誰開如是
解脫之門誰能雷震諸佛音聲誰於生死睡眠之中
而獨覺寤唱如是言誰能於此示導生死饑饉衆生
無上道味無量衆生沈生死海誰能於中作大船師
是諸衆生常爲煩惱重病所纏誰能於中爲作良醫
說是半偈啓悟我心猶如半月漸開蓮華善男子我
於是時更無所見唯見羅刹復作是念將是羅刹說
是偈耶覆復生疑或非其說何以故是人形容甚可
怖畏若有得聞是偈句者一切恐怖醜陋卽除何有
此人形貌如是能說此偈不應火中出生蓮華非日

光中出生冷水善男子我於爾時復作是念我今無
智而此羅刹或能得見過去諸佛從諸佛所聞是半
偈我今當問即便前至是羅刹所作如是言善哉大
士汝於何處得是過去離怖畏者所說半偈大士汝
於何處而得如是半如意珠大士是半偈義乃是過
去未來現在諸佛世尊之正道也一切世間無量衆
生常爲諸見羅網所覆終身於此外道法中初不得
聞如是出世十力世雄所說空義善男子我問是已
卽答我言大婆羅門汝今不應問我是義何以故我
不食來已經多日處處求索了不能得飢渴苦惱心

亂謬語非我本心之所知也我今力能飛行虛空至
鬱單越乃至天上處處求食而不能得以是之故我
說是語善男子我時卽復語羅刹言大士若能爲我
說是偈竟我當終身爲汝弟子大士汝所說者名字
不終義亦不盡以何因緣不欲說耶夫財施者則有
竭盡法施因緣不可盡也法施無盡多所利益我今
聞此半偈法已心生驚疑汝今幸可爲我除斷說此
偈竟我當終身爲汝弟子羅刹答言汝智太過但自
愛身都不見念今我定爲飢苦所逼實不能說我卽
問言汝所食者爲是何物羅刹答言汝不足問我若

說者令人多怖我復語言此中獨處更無有人我不
畏汝何故不說羅刹答言我所食者唯人煖肉其所
飲者唯人熱血自我薄福唯食此食周徧求索困不
能得世雖多人皆有福德兼爲諸天之所守護而我
無力不能得殺善男子我復語言汝但具足說是半
偈我聞偈已當以此身奉施供養大士我設命終如
此之身無所復用當爲虎狼鴟梟鷂鷲之所啖食而
復不得一毫之福我今爲求阿耨多羅三藐三菩提
捨不堅身以易堅身羅刹答言誰當信汝如是之言
爲八字故弃所愛身善男子我卽答言汝真無智譬

如有人施他瓦器得七寶器我亦如是捨不堅身得
金剛身汝言誰當信者我今有證大梵天王釋提桓
因及四天王能證是事復有天眼諸菩薩等爲欲利
益無量衆生修行大乘具六度者亦能證知復有十
方諸佛世尊利衆生者亦能證我爲八字故捨是身
命羅刹復言汝若如是能捨身者諦聽諦聽當爲汝
說其餘半偈善男子我於爾時聞是語已心中歡喜
卽解已身所著鹿皮爲此羅刹敷置法座白言和上
願坐此座我卽於前叉手長跪而作是言惟願和上
善爲我說其餘半偈令得具足羅刹卽說

生滅滅已 寂滅爲樂

爾時羅刹說是偈已復作是言菩薩摩訶薩汝今已聞具足偈義汝之所願爲悉滿足若必欲利諸衆生者時施我身善男子我於爾時深思此義然後處處若石若壁若樹若道書寫此偈即便更繫所著衣裳恐於死後身體露現卽上高樹爾時樹神復問我言善哉仁者欲作何事善男子我時答言我欲捨身以報偈價樹神又言如是偈者何所利益我時答言如是偈句乃是過去未來現在諸佛所說開空法道我爲此法弃捨身命不爲利養名聞財寶轉輪聖王四

大天王釋提桓因大梵天人天中樂爲欲利益一切衆生故捨此身善男子我捨身時復作是願願令一切慳惜之人悉來見我捨離此身若有少施起貢高者亦令得見我爲一偈捨此身命如弃草木我於爾時說是語已尋卽放身自投樹下下未至地時虛空中出種種聲其聲乃至阿迦尼吒爾時羅刹遠復釋形卽於空中接取我身安置平地爾時釋提桓因及諸天人大梵天王稽首頂禮於我足下讚言善哉善哉真是菩薩能大利益無量衆生欲於無明黑闇之中然大法炬由我愛惜如來大法故詔燒惱惟願

聽我懺悔罪咎汝於未來必定成就阿耨多羅三藐
三菩提願見濟度爾時釋提桓因及諸天衆頂禮我
足於是辭去忽然不見善男子如我往昔爲半偈故
捨弃此身以是因緣便得超越足十二劫在彌勒前
成阿耨多羅三藐三菩提善男子我得如是無量功
德皆由供養如來正法善男子汝今亦爾發阿耨多
羅三藐三菩提心則已超過無量無邊恒河沙等諸
菩薩上善男子是名菩薩住於大乘大般涅槃修於
聖行

南本大般涅槃經卷第十三

音釋

歌羅邏

梵語也此云疑
滑遲朗可切

糝

莫結切
糝也

輓

而亮切
柔也

羸提

古亮切
不孝鳥

也
羸羸初限切
羸羸都聊切
也
鷓鴣也

桴

縛謀切擊
鼓杖也

鷓

赤脂切
鷓也

臬

古亮切
不孝鳥

福建福寧州福安縣尹丹陽賀學易施資刻此
南本大般涅槃經第十三卷 計字八千六百
十五箇銀四兩四錢八分
武林釋如德對長洲徐普書句容潘繼德刻
萬曆甲寅歲夏四月徑山化城識

南本大般涅槃經卷第十四

北涼天竺三藏曇無讖譯梵

宋沙門慧嚴慧觀同謝靈運再治

梵行品第二十一

善男子云何菩薩摩訶薩梵行善男子菩薩摩訶薩
住於大乘大般涅槃住七善法得具梵行何等爲七
一者知法二者知義三者知時四者知足五者自知
六者知衆七者知尊卑善男子云何菩薩摩訶薩知
法善男子是菩薩摩訶薩知十二部經所謂修多羅
祇夜受記伽陀優陀那尼陀那阿波陀那伊帝目多

伽闍陀伽毗佛略阿浮陀達磨優波提舍善男子何等名爲修多羅經從如是我聞乃至歡喜奉行如是一切名修多羅何等名爲祇夜經佛告諸比丘昔我與汝愚無智慧不能如實見四真諦是故流轉久處生死沒大苦海何等爲四苦集滅道如佛昔日爲諸比丘說契經竟爾時復有利根衆生爲聽法故後至佛所卽便問人如來向者爲說何事佛時知已卽因本經以偈頌曰

我昔與汝等 不見四真諦 是故久流轉
生死大苦海 若能見四諦 則得斷生死

生死已盡 更不受諸有 是名祇夜經
何等名爲受記經如有經律如來說時爲諸天人受佛記勃汝阿逸多未來有王名曰儂佉當於是世而成佛道號曰彌勒是名受記何等名爲伽陀經除修多羅及諸戒律其餘有說四句之偈所謂

諸惡莫作 衆善奉行 自淨其意
是諸佛教 是名伽陀

何等名爲優陀那經如佛晡時入於禪定爲諸天衆廣說法要時諸比丘各作是念如來今者爲何所作如來明旦從禪定起無有人問以他心智卽自說言

比丘當知一切諸天壽命極長汝諸比丘善哉爲他
不求已利善哉少欲善哉知足善哉寂靜如是諸經
無問自說是名優陀那何等名爲尼陀那經如諸經
偈所因根本爲他演說如舍衛國有一丈夫羅網捕
鳥得已籠繫隨與水穀而復還放世尊知其本末因
緣而說偈言

莫輕小惡

以爲無殃

水滸雖微

漸盈大器

是名尼陀那

何等名爲阿波陀那經如戒律中所說譬喻是名阿
波陀那何等名爲伊帝目多伽經如佛所說比丘當

知我出世時所可說者名曰界經鳩留秦佛出世之
時名甘露鼓拘那含牟尼佛時名曰法鏡迦葉佛時
名曰分別空是名伊帝目多伽何等名爲闍陀伽經
如佛世尊本爲菩薩修諸苦行所謂比丘當知我於
過去作鹿作羆作麀作兔作粟散王轉輪聖王龍金
翅鳥諸如是等行菩薩道時所可受身是名闍陀伽
何等名爲毗佛略經所謂大乘方等經典其義廣大
猶如虛空是名毗佛略何等名爲未曾有經如彼菩
薩初出生時無人扶持卽行七步放大光明徧照十
方亦如獼猴手捧蜜器以獻如來如白項狗佛邊聽

法如魔波旬變爲青牛行瓦鉢間令諸瓦鉢互相振
觸無所傷損如佛初生入天廟時令彼天像起下禮
敬如是等經名未曾有何等名爲優波提舍經如佛
世尊所說諸經若作議論分別廣說辨其相貌是名
優波提舍菩薩若能如是了知十二部經名爲知法
云何菩薩摩訶薩知義菩薩摩訶薩若於一切文字
語言廣知其義是名知義云何菩薩摩訶薩知時善
男子菩薩善知如是時中任修寂靜如是時中任修
精進如是時中任修捨定如是時中任供養佛如是
時中任供養師如是時中任修布施持戒忍辱精進

禪定具足般若波羅蜜是名知時云何菩薩摩訶薩
知足善男子菩薩知足所謂飲食衣藥行住坐臥睡
寤語默是名知足善男子云何菩薩摩訶薩自是
菩薩自知我有如是信如是戒如是多聞如是捨如
是慧如是去來如是正念如是善行如是問如是答
是名自知云何菩薩摩訶薩知衆善男子是菩薩知
如是等是刹利衆婆羅門衆居士衆沙門衆應於是
衆如是行來如是坐起如是說法如是問答是名知
衆善男子云何菩薩摩訶薩知人尊卑善男子人有
二種一者信二者不信菩薩當知信者是善不信者

經
一
才
冊
法
無
量
壽
經
十
四
石
四
不名爲善復次信有二種一者常往僧坊二者不往菩薩當知其往者善其不往者不名爲善往僧坊者復有二種一者禮拜二不禮拜菩薩當知禮拜者善不禮拜者不名爲善其禮拜者復有二種一者聽法二者不聽菩薩當知聽法者善不聽法者不名爲善其聽法者復有二種一至心聽二不至心菩薩當知至心聽者是則名善不至心者不名爲善至心聽法復有二種一者思義二不思義菩薩當知思義者善不思義者不名爲善其思義者復有二種一如說行二不如說行如說行者是則爲善不如說行不名爲

善如說行者復有二種一求聲聞不能利安饒益一切苦惱衆生二者迴向無上大乘利益多人令得安樂菩薩應知能利多人得安樂者最上最善善男子如諸寶中如意寶珠最爲勝妙如諸味中甘露最上如是菩薩於人天中最勝最上不可譬喻善男子是名菩薩摩訶薩住於大乘大涅槃經住七善法菩薩住是七善法已得具梵行復次善男子復有梵行謂慈悲喜捨迦葉菩薩白佛言世尊若多修慈能斷瞋恚修悲心者亦斷瞋恚云何而言四無量心推義而言則應有三世尊慈有三緣一緣衆生二緣於法三

則無緣悲喜捨心亦復如是若從是義唯應有一不應有四衆生緣者緣於五陰願與其樂是名衆生緣法緣者緣諸衆生所須之物而施與之是名法緣無緣者緣於如來是名無緣慈者多緣貧窮衆生如來大師永離貧窮受第一樂若緣衆生則不緣佛法亦如是以是義故緣如來者名曰無緣世尊慈之所緣一切衆生如緣父母妻子親屬以是義故名衆生緣法緣者不見父母妻子親屬見一切法皆從緣生是名法緣無緣者不住法相及衆生相是名無緣悲喜捨心亦復如是是故應三不應有四世尊人有二種

一者見行二者愛行見行之人多修慈悲愛行之人多修喜捨是故應二不應有四世尊夫無量者名曰無邊邊不可得故名無量若無量者則應是一不應言四若言四者何得無量是故應一不應四也佛告迦葉善男子諸佛如來爲諸衆生所宣法要其言祕密難可了知或爲衆生說一因緣如說何等爲一因緣所謂一切有爲之法善男子或說二種因緣及果或說三種煩惱業苦或說四種無明諸行生與老死或說五種所謂受愛取有及生或說六種三世因果或說七種謂識名色六入觸受及以愛取或說八種

除無明行及生老死其餘八事或說九種如城經中
除無明行識其餘九事或說十一如爲薩遮尼捷子
說除生一法其餘十一或時具說十二因緣如王舍
城爲迦葉等具說十二無明乃至生老病死善男子
如一因緣爲衆生故種種分別無量心法亦復如是
善男子以是義故於諸如來深祕行處不應生疑善
男子如來世尊有大方便無常說常常說無常說樂
爲苦說苦爲樂不淨說淨淨說不淨我說無我無我
說我於非衆生說爲衆生於實衆生說非衆生非物
說物物說非物非實說實實說非實非境說境境說

非境非生說生生說非生乃至無明說明明說無明
色說非色非色說色非道說道道說非道善男子如
來以是無量方便爲調衆生豈虛妄耶善男子或有
衆生貪於財貨我於其人自化其身作轉輪王於無
量歲隨其所須種種供給然後教化令其安住阿耨
多羅三藐三菩提若有衆生貪著五欲於無量歲以
妙五欲充滿其願然後勸化令其安住阿耨多羅三
藐三菩提若有衆生榮豪自貴我於其人無量歲中
爲作僕使趨走給侍得其心已卽復勸化令其安住
阿耨多羅三藐三菩提若有衆生性戾自是須人訶

諫我於無量百千歲中教訶敦喻令心調順然後復
勸令其安住阿耨多羅三藐三菩提善男子如來如
是於無量歲以種種方便令諸衆生安住阿耨多羅
三藐三菩提豈虛妄耶諸佛如來雖處衆惡無所染
汙猶如蓮華善男子應如是知四無量義善男子是
無量心體性有四若有修行生大梵處善男子如是
無量伴類有四故名四夫修慈者能斷貪欲修悲
心者能斷瞋恚修喜心者能斷不樂修捨心者能斷
貪欲瞋恚衆生善男子以是義故得名爲四非一二
三善男子如汝所言慈能斷瞋悲亦如是應說三者

汝今不應作如是難何以故善男子恚有二種一能
奪命二能鞭撻修慈則能斷彼奪命修悲則能除彼
鞭撻善男子以是義故豈非四耶復次瞋有二種一
瞋衆生二瞋非衆生修慈心者斷瞋衆生修悲心者
斷非衆生復次瞋有二種一有因緣二無因緣修慈
心者斷有因緣修悲心者斷無因緣復次瞋有二種
一於過去久已積習二於現在今始積習修慈心者
能斷過去修悲心者斷於現在復次瞋有二種一瞋
聖人二瞋凡夫修慈心者斷瞋聖人修悲心者斷瞋
凡夫復次瞋有二種一上二中修慈斷上修悲斷中

善男子以是義故則名爲四何得難言應三非四是故迦葉是無量心伴類相對分別爲四復以器故應名爲四器若有慈則不得有悲喜捨心以是義故應四無減善男子以行分別故應有四若行慈時無悲喜捨是故有四善男子以無量故亦得名四夫無量者則有四種有無量心有緣非自在有無量心自在非緣有無量心亦緣亦自在有無量心非緣非自在何等無量有緣非自在緣於無量無邊衆生而不能得自在三昧雖得不定或得或失何等無量自在非緣如緣父母兄弟姊妹欲令安樂非無量緣何等無

量亦緣亦自在謂諸佛菩薩何等無量非緣非自在聲聞緣覺不能廣緣無量衆生亦非自在善男子以是義故名四無量非諸聲聞緣覺所知乃是諸佛如來境界善男子如是四事聲聞緣覺雖名無量少不足言諸佛菩薩乃得名爲無量無量迦葉菩薩白佛言世尊如是如是實如聖言諸佛如來所有境界非諸聲聞緣覺所及世尊頗有菩薩住於大乘大般涅槃得慈悲心非是大慈大悲心不佛言有善男子菩薩若於諸衆生中三品分別一者所親二者怨憎三者中人於親人中復作三品謂上中下怨憎亦爾是

菩薩摩訶薩於上親所與增上樂於中下親亦復平等與增上樂於上怨所與少分樂於中怨所與中品樂於下怨所與增上樂菩薩如是轉增修習於上怨所與中品樂於中下怨等與上樂轉復修習於上中下等與上樂若上怨所與上樂者爾時得名慈心成就菩薩爾時於其父母及上怨所得平等心無有差別善男子是名得慈非大慈也世尊何緣菩薩得如是慈猶故不得名爲大慈善男子以成難故不名大慈何以故久於過去無量劫中多集煩惱未修善法是故不能於一日中調伏其心善男子譬如豌豆乾

時錐刺終不可著諸煩惱堅亦復如是雖一日夜繫心不散難可調伏又如家犬不畏於人山林野鹿見人怖走嗔恚難去如守家狗慈心易失如彼野鹿是故此心難可調伏以是義故不名大慈復次善男子譬如畫石其文常在畫水速滅勢不久住嗔恚難除譬如畫石善根易滅猶如畫水是故此心難可調伏如大火聚其明久住電光之明不得暫停嗔如火聚慈如電明是故此心難得調伏以是義故不名大慈善男子菩薩摩訶薩住於初地名曰大慈何以故善男子最極惡者名一闍提初住菩薩修大慈時於一

闡提心無差別不見其過故不生瞋以是義故得名
大慈善男子爲諸衆生除無利益是名大慈欲與衆
生無量利樂是名大悲於諸衆生心生歡喜是名大
喜無所擁護名爲大捨若不見我法相已身見一切
法平等無二是名大捨自捨已樂施與他人是名大
捨善男子唯四無量能令菩薩增長具足六波羅蜜
其餘諸行不必能爾善男子菩薩摩訶薩先得世間
四無量心然後乃發阿耨多羅三藐三菩提心次第
方得出世間者善男子因世無量得出世無量以是
義故名大無量迦葉菩薩白佛言世尊除無利益與

利樂者實無所爲如是思惟卽是虛觀無有實利世
尊譬如比丘觀不淨時見所著衣悉是皮想而實非
皮所可食啗皆作蟲想而實非蟲觀好美羹作穢汁
想而實非穢觀所食酪猶如髓腦而實非腦觀骨碎
殊猶如麩想而實非麩四無量心亦復如是不能眞
實利益衆生令其得樂雖口發言與衆生樂而實不
得如是之觀非虛妄耶世尊若非虛妄實與樂者彼
諸衆生何故不以諸佛菩薩威德力故一切受樂若
當眞實不得樂者如佛所說我念往昔唯修慈心經
此劫世七反成壞不來此生世界成時生梵天中世

界壞時生光音天若生梵天力勢自在無能摧伏於
千梵中最勝最上名大梵王有諸衆生皆於我所生
最上想三十六反作忉利王釋提桓因無量百千作
轉輪王唯修慈心乃得如是人天果報若不實者云
何得與此義相應佛言善哉善哉善男子汝真勇猛
無所畏懼卽爲迦葉而說偈言

若於一衆生 不生嗔恚心 而願與彼樂
是名爲慈善 一切衆生中 若起於悲心
是名聖種性 得福報無量 設使五通仙
悉滿此大地 有大自在王 奉施其所安

象馬種種物 所得福報果 不及修一慈

十六分中一

善男子夫修慈者實非妄想諦是真實若是聲聞緣
覺之慈是名虛妄諸佛菩薩真實不虛云何知耶善
男子菩薩摩訶薩修行如是大涅槃者觀土爲金觀
金爲土地作水相水作地相水作火相火作水相地
作風相風作地相隨意成就無有虛妄觀實衆生爲
非衆生觀非衆生爲實衆生悉隨意成無有虛妄善
男子當知菩薩四無量心是實思惟非不真實復次
善男子云何名爲真實思惟謂能斷除諸煩惱故善

經
六舟
卷十四
十一
在四
男子夫修慈者能斷貪欲修悲心者能斷瞋恚修喜
心者能斷不樂修捨心者能斷貪恚及眾生相以是
故名真實思惟復次善男子菩薩摩訶薩四無量心
能爲一切諸善根本善男子菩薩摩訶薩若不得見
貧窮眾生無緣生慈若不生慈則不能起惠施之心
以施因緣令諸眾生得安隱樂所謂飲食車乘衣服
華香牀臥舍宅燈明如是施時心無繫縛不生貪著
必定迴向阿耨多羅三藐三菩提其心爾時無所依
止妄想永斷不爲怖畏名稱利養不求人天所受快
樂不生憍慢不望反報不爲誑他故行布施不求富

貴凡行施時不見受者持戒破戒是田非田此是知
識此非知識施時不見是器非器不擇日時是處非
處亦復不計饑饉豐樂不見因果此是衆生此非衆
生是福非福雖復不見施者受者及以財物乃至不
見斷及果報而常行施無有斷絕善男子菩薩若見
持戒破戒乃至果報終不能施若不布施則不具足
檀波羅蜜若不具足檀波羅蜜則不能成阿耨多羅
三藐三菩提善男子譬如有人身被毒箭其人眷屬
欲令安隱爲除毒故卽命良醫而爲拔箭彼人方言
且待莫觸我今當觀如是毒箭從何方來誰之所射

爲是刹利婆羅門毗舍首陁復更作念是何木耶竹
耶柳耶其鏃鐵者何冶所出剛耶柔耶其毛羽者是
何鳥翼鳥鴟鷲耶所有毒者爲從作生自然而有爲
是人毒惡蛇毒耶如是癡人竟未能知尋便命終善
男子菩薩亦爾若行施時分別受者持戒破戒乃至
果報終不能施若不能施則不具足檀波羅蜜若不
具足檀波羅蜜則不能成阿耨多羅三藐三菩提復
次善男子菩薩摩訶薩行布施時於諸衆生慈心平
等猶如子想又行施時於諸衆生起悲憫心譬如父
母瞻視病子行施之時其心歡喜猶如父母見子病

愈旣施之後其心放捨猶如父母見子長大能自存
活是菩薩摩訶薩於慈心中布施食時常作是願我
今所施悉與一切衆生共之以是因緣令諸衆生得
大智食勤進迴向無上大乘願諸衆生得善智食不
求聲聞緣覺之食願諸衆生得法喜食不求愛食願
諸衆生悉得般若波羅蜜食皆令充滿攝取無闕增
上善根願諸衆生解達空相得無闕身猶如虛空願
諸衆生常爲受者憐憫一切爲衆福田善男子菩薩
摩訶薩修慈心時凡所施食應當堅發如是等願復
次善男子菩薩摩訶薩於慈心中布施漿時常作是

願我今所施悉與一切衆生共之。以是因緣，令諸衆生趣大乘。河飲八味水，速履無上菩提之道。離於聲聞緣覺，枯竭渴仰，志求無上。佛乘斷煩惱，渴仰法味，離生死愛樂。大乘大般涅槃，具足法身，得諸三昧。入於甚深智慧大海，願諸衆生得甘露味。菩提出世離欲寂靜，如是諸味，願諸衆生具足無量百千法味。具法味已，得見佛性。見佛性已，能雨法雨。雨法雨已，佛性徧覆，猶如虛空。復令其餘無量衆生得一法味。所謂大乘非諸聲聞辟支佛味。願諸衆生得一甜味。無有六種差別之味。願諸衆生唯求法味，無闕佛

法所行之味。不求餘味。善男子，菩薩摩訶薩於慈心中，布施漿時，應當堅發如是等願。復次善男子，菩薩摩訶薩於慈心中，施車乘時，常作是願。我今所施悉與一切衆生共之。以是因緣，普令衆生成於大乘。得住大乘不退。於乘不動轉乘金剛座。乘不求聲聞辟支佛。乘向於佛。乘無能伏乘無羸乏。乘不退沒乘無上。乘十力乘大功德。乘未曾有乘。希有乘難得乘無邊乘。知一切乘善男子，菩薩摩訶薩於慈心中，施車乘時，常應如是堅發誓願。復次善男子，菩薩摩訶薩於慈心中，布施衣時，常作是願。我今所施悉與一切

衆生共之以是因緣令諸衆生得慚愧衣法界覆身裂諸見衣衣服離身一尺六寸得金色身所受諸觸柔輒無闕光色潤澤皮膚細輒常光無量無色離色願諸衆生皆悉普得無色之身過一切色得入無色大般涅槃善男子菩薩摩訶薩布施衣時應當如是堅發誓願復次善男子菩薩摩訶薩於修慈中布施華香塗香料香諸雜香時常作是願我今所施悉與一切衆生共之以是因緣令諸衆生一切皆得佛華三昧七覺妙鬘繫其首頂願諸衆生形如滿月所見諸色微妙第一願諸衆生皆成一相百福莊嚴願諸

衆生隨意得見可意之色願諸衆生常遇善友得無闕香離諸臭穢願諸衆生具諸善根無上珍寶願諸衆生相視和悅無有憂苦咸備衆善不相憂念願諸衆生戒香具足願諸衆生持無闕戒香氣芬馥充滿十方願諸衆生得堅牢戒無悔之戒一切智戒離諸破戒悉得無戒未曾有戒無師戒無作戒無穢戒無汙染戒竟已戒究竟戒平等戒塗割善惡等無憎愛願諸衆生得無上戒大乘之戒非小乘戒願諸衆生悉得具足尸波羅蜜猶如諸佛所成就戒願諸衆生悉爲布施持戒忍辱精進禪智之所熏修願諸衆生

悉得成就大般涅槃微妙蓮華其華香氣充滿十方
願令衆生純食大乘大般涅槃無上香膳如蜂采華
但取香味願諸衆生悉得成就無量功德所熏之身
善男子菩薩摩訶薩於慈心中施華香時常當堅發
如是誓願復次善男子菩薩摩訶薩於慈心中施牀
敷時常作是願我今所施悉與一切衆生共之以是
因緣令諸衆生得天中天所臥之牀得大智慧坐四
禪處臥於菩薩所臥之牀不臥聲聞辟支佛牀願諸
衆生得安樂臥離生死牀成大涅槃師子臥牀願諸
衆生坐此牀已復爲其餘無量衆生示現神通師子

遊戲願諸衆生住此大乘大宮殿中爲諸衆生演說
佛性願諸衆生坐無上牀不爲世法之所降伏願諸
衆生得忍辱牀離於生死饑饉凍餓願諸衆生得無
畏牀永離一切煩惱怨賊願諸衆生得清淨牀專求
無上正真之道願諸衆生得善法牀常爲善友之所
擁護願諸衆生得右脅臥牀依因諸佛所行之法善
男子菩薩摩訶薩於慈心中施牀敷時應當堅發如
是誓願復次善男子菩薩摩訶薩於慈心中施舍宅
時常作是願我今所施悉與一切衆生共之以是因
緣令諸衆生處大乘舍修行善友所行之行修大悲

行六波羅蜜行大正覺行一切菩薩所行道行無邊
廣大如虛空行願諸衆生皆得正念遠離惡念願諸
衆生悉得安住常樂我淨永離四倒願諸衆生悉皆
受持出世文字願諸衆生必爲無上一切智器願諸
衆生悉皆得入甘露法舍願諸衆生初中後心常入
大乘涅槃之宅願諸衆生於未來世常處菩薩所居
宮殿善男子菩薩摩訶薩於慈心中施舍宅時常常
堅發如是誓願復次善男子菩薩摩訶薩於慈心中
施燈明時常作是願我今所施悉與一切衆生共之
以是因緣令諸衆生光明無量安住佛法願諸衆生

常得照明願諸衆生得色微妙光澤第一願諸衆生
其目清淨無諸翳網願諸衆生得大智炬善解無我
無衆生相無人無命願諸衆生皆得親見清淨佛性
猶如虛空願諸衆生肉眼清淨徹見十方恒沙世界
願諸衆生得佛光明普照十方願諸衆生得無閼明
皆悉得見清淨佛性願諸衆生得大智明破一切闇
又一闍提願諸衆生得無量光普照無量諸佛世界
願諸衆生然大乘燈離二乘錠願諸衆生所得光明
滅無明闇過逾千日願諸衆生得火珠明悉滅三千
大千世界所有黑闇願諸衆生具足五眼悟諸法相

成無師覺願諸衆生無見無明願諸衆生悉得大乘
大般涅槃微妙光明示悟衆生真實佛性善男子菩
薩摩訶薩於慈心中施燈明時常應堅發如是誓願
善男子一切聲聞緣覺菩薩諸佛如來所有善根慈
爲根本善男子菩薩摩訶薩修習慈心能生如是無
量善根所謂不淨出息入息無常生滅四念處七方
便三觀處十二因緣無常等觀煖法頂法忍法世第
一法見道修道正勤如意諸根諸力七菩提分八道
四禪四無量心八解脫八勝處十一切入空無相願
無諍三昧知他心智及諸神通知本際智聲聞智緣

覺智菩薩智佛智善男子如是等法慈爲根本善男
子以是義故慈是真實非虛妄也若有人問誰是一
切諸善根本當言慈是以是義故實非虛妄善男子
能爲善者名實思惟實思惟者卽名爲慈慈卽如來
慈卽大乘大乘卽慈慈卽如來善男子慈卽菩提道
菩提道卽如來如來卽慈善男子慈卽大梵大梵卽
慈慈卽如來善男子慈者能爲一切衆生而作父母
父母卽慈慈卽如來善男子慈者乃是不可思議諸
佛境界不可思議諸佛境界卽是慈也當知慈者卽
是如來善男子慈者卽是衆生佛性如是佛性久爲

煩惱之所覆蔽故令衆生不得覩見佛性卽慈慈卽
如來善男子慈卽大空大空卽慈慈卽如來善男子
慈卽虛空虛空卽慈慈卽如來善男子慈卽是常常
卽是法法卽是僧僧卽是慈慈卽如來善男子慈卽
是樂樂卽是法法卽是僧僧卽是慈慈卽如來善男
子慈卽是淨淨卽是法法卽是僧僧卽是慈慈卽如
來善男子慈卽是我我卽是法法卽是僧僧卽是慈
慈卽如來善男子慈卽甘露甘露卽慈慈卽佛性佛
性卽法法卽是僧僧卽是慈慈卽如來善男子慈者
卽是一切菩薩無上之道道卽是慈慈卽如來善男

子慈者卽是諸佛世尊無量境界無量境界卽是慈
也當知是慈卽是如來善男子慈若無常無常卽慈
當知是慈是聲聞慈善男子慈若是苦苦卽是慈當
知是慈是聲聞慈善男子慈若不淨不淨卽慈當知
是慈是聲聞慈善男子慈若無我無我卽慈當知是
慈是聲聞慈善男子慈若妄想妄想卽慈當知是慈
是聲聞慈善男子慈若不名檀波羅蜜非檀之慈當
知是慈是聲聞慈乃至般若波羅蜜亦復如是善男
子慈若不能利益衆生如是之慈是聲聞慈善男子
慈若不入一相之道當知是慈是聲聞慈善男子慈

經 二 大册造勢經卷十四 二十一 石四
若不能覺了諸法當知是慈是聲聞慈善男子慈若不能見如來性當知是慈是聲聞慈善男子慈若見法悉是有相當知是慈是聲聞慈善男子慈若有漏有漏慈者是聲聞慈善男子慈若有爲有爲之慈是聲聞慈善男子慈若不能住於初住非初住慈當知卽是聲聞之慈善男子慈若不能得佛十力四無所畏當知是慈是聲聞慈善男子慈若能得四沙門果當知是慈是聲聞慈善男子慈若有無非有非無如是之慈非諸聲聞辟支佛等所能思議善男子慈若不可思議法不可思議佛性不可思議如來亦不可

思議善男子菩薩摩訶薩住於大乘大般涅槃修如是慈雖復安於睡眠之中而不睡眠勤精進故雖常覺寤亦無覺寤以無眠故於睡眠中諸天雖護亦無護者不行惡故眠不惡夢無有不善離睡眠故命終之後雖生梵天亦無所生得自在故善男子夫修慈者能得成就如是無量無邊功德善男子是大涅槃微妙經典亦能成就如是無量無邊功德諸佛如來亦得成就如是無量無邊功德迦葉菩薩白佛言世尊菩薩摩訶薩所有思惟悉是真實聲聞緣覺非真實者一切衆生何故不以菩薩威力等受快樂若諸

衆生實不得樂當知菩薩所修慈心爲無利益佛言
善男子菩薩之慈非不利益善男子有諸衆生或必
受苦或有不受苦若有衆生必受苦者菩薩之慈爲無
利益謂一闍提若有受苦不必定者菩薩之慈則爲
利益令彼衆生悉受快樂善男子譬如有人遙見師
子虎豹豺狼羅刹鬼等自然生怖夜行見杙亦生恐
畏善男子如是諸人自然怖畏衆生如是見修慈者
自然受樂善男子以是義故菩薩修慈是實思惟非
無利益善男子我說是慈有無量門所謂神通善男
子如提婆達教阿闍世欲害如來是時我入王舍大

城次第乞食阿闍世王卽放護財狂醉之象欲令害
我及諸弟子其象爾時踰殺無量百千衆生衆生死
已多有血氣是象嗅已狂醉倍常見我翼從被服赤
色謂呼是血而復見趣我弟子中未離欲者四散馳
走唯除阿難爾時王舍城中一切人民同時舉聲號
哭流淚作如是言怪哉如來今日終沒如何正覺一
旦散壞是時調達心生歡喜瞿曇沙門滅沒甚善從
今已往真是不現快哉此計我願得遂善男子我於
爾時爲欲降伏護財象故卽入慈定舒手示之卽於
五指出五師子是象見已其心怖畏失大小便舉身

經
一
二
三
四
五
六
七
八
九
210
1
2
3
4
5
6
7
8
9
210
1
2
3
4
5
6
7
8
9
22

投地敬禮我足善男子我時手指實無師子乃是修
慈善根力故令彼調伏復次善男子我欲涅槃始初
發足向拘尸那城有五百力士於其中路平治掃灑
中有一石衆欲舉移盡力不能我時憐憫卽起慈心
彼諸力士尋卽見我以足拇指舉此大石擲置虛空
還以手接安置右掌吹令碎秣復還合之令彼力士
貢高心息卽爲略說種種法要令其俱發阿耨多羅
三藐三菩提心善男子如來爾時實不以指舉此大
石在虛空中還置右掌吹令碎秣復合如本善男子
當知卽是慈善根力令諸力士見如是事復次善男

子此南天竺有一大城名首波羅於是城中有一長
者名曰盧至爲衆導主已於過去無量佛所植諸善
本善男子彼大城中一切人民信伏邪道奉事尼乾
我時欲度彼長者故從王舍城至彼城邑其間相去
六十五由旬佛與大衆步行而往爲欲化度彼諸人
故尼捷聞我欲至彼城卽作是念沙門瞿曇若至此
者此諸人民便當捨我不復供給我等窮悴如何存
活諸尼捷輩各各分布告彼城人沙門瞿曇今欲來
此然諸沙門委弃父母東西馳騁所至之處能令土
地五穀不登人民饑饉死亡者衆病瘦相尋無可救

解瞿曇無賴純將諸惡羅刹鬼神以爲侍從無父無
母孤窮之人而就咨啓爲作門徒所可教詔純說虛
空隨其至處初無安樂彼人聞已卽懷怖畏頭面敬
禮尼捷子足白言大師我等今者當設何計尼捷答
言沙門瞿曇性好叢林流泉清水外設有者宜應毀
壞汝等便可相與出城斬伐林木勿令有遺流泉井
池填以臭穢堅閉城門各嚴器仗當壁防護勤自固
守彼設來者莫令得前若不前者汝當安隱我等亦
當作種種術令彼瞿曇復道還去彼諸人民聞是語
已敬奉施行斬伐樹木汗辱諸水莊嚴器仗牢自防

護善男子我於爾時至彼城已不見一切樹木叢林
唯見諸人莊嚴器仗當壁自守見是事已尋生憐憫
慈心向之所有樹木還生如本復更生長其餘諸樹
不可稱計河池井泉其水清淨盈滿其中如青瑠璃
生衆雜華彌覆其上變其城壁爲紺瑠璃城內人民
悉得徹見我及大衆門自開闢無能制者所嚴器仗
變成雜華盧至長者而爲上首與其人民俱共相隨
來至我所我卽爲說種種法要令彼諸人一切皆發
阿耨多羅三藐三菩提心善男子我於爾時實不化
作種種樹木清淨流水盈滿河池變其本城爲紺瑠

璫令彼人民徹見我身開其城門器仗爲華善男子
當知皆是慈善根力能令彼人見如是事復次善男
子舍衛城有婆羅門女名婆私吒唯有一子愛之甚
重遇病命終爾時女人愁毒入心狂亂失性裸身無
恥遊行四衢啼哭失聲唱言子汝何處去周徧城
邑無有休已而是女人已於先佛植衆德本善男子
我於是女起慈憫心是時女人卽得見我便生子想
還得本心前抱我身如愛子法我時卽告侍者阿難
汝可持衣與是女人旣與衣已便爲種種說諸法要
是女聞法歡喜踊躍發阿耨多羅三藐三菩提心善

男子我於爾時實非彼子彼非我母亦無抱持善男
子當知皆是慈善根力令彼女人見如是事復次善
男子波羅柰城有優婆夷名摩訶斯那達多已於過
去無量先佛種諸善根是優婆夷夏九十日屈請衆
僧奉施醫藥是時衆中有一比丘身嬰重病良醫診
之當須肉藥若得肉者病則可除若不得肉命將不
全時優婆夷聞醫此言尋持黃金徧至市里唱如是
言誰有肉賣吾欲買之若有肉者當等與金周徧城
市悉不能得是優婆夷尋自取刀割其股肉切以爲
羹下種種香施病比丘比丘服已病卽得差是優婆

夷患瘡苦惱不能堪忍卽發聲言南無佛陀南無佛
陀我於爾時在舍衛城聞其音聲於是女人起大慈
心是女尋見我持良藥塗其瘡上還復如本我卽爲
說種種妙法聞法歡喜發阿耨多羅三藐三菩提心
善男子我於爾時實不往至波羅柰城持藥塗彼優
婆夷身善男子當知皆是慈善根力令彼女人見如
是事復次善男子調達惡人貪不知足多服酥故頭
痛腹滿受大苦惱不能堪忍發如是言南無佛陀南
無佛陀我時住在優禪尼城聞其音聲卽生慈心爾
時調達尋便見我住至其所手摩頭腹授與鹽湯而

令服之服已平復善男子我實不往提婆達所摩其
頭腹授湯令服善男子當知皆是慈善根力令提婆
達見如是事復次善男子憍薩羅國有諸羣賊其數
五百羣黨鈔劫爲害滋甚波斯匿王患其縱暴遣兵
伺捕得已挑眼逐著黑闇叢林之下是諸羣賊已於
先佛植衆德本旣失目已受大苦惱各作是言南無
佛陀南無佛陀我等今者無有救護啼哭號咷我時
住在祇洹精舍聞其音聲卽生慈心時有涼風吹香
山中種種香藥滿其眼眵尋還得眼如本不異諸賊
開眼卽見如來住立其前而爲說法賊聞法已發阿

耨多羅三藐三菩提心善男子我於爾時實不作風
吹香山中種種香藥住其人前而爲說法善男子當
知皆是慈善根力令彼羣賊見如是事復次善男子
瑠璃太子以愚癡故廢其父王自立爲主復念宿嫌
多害釋種取萬二千釋種諸女刑剝耳鼻斷截手足
推之阨壑時諸女人身受苦惱作如是言南無佛陀
南無佛陀我等今者無有救護復大號咷是諸女人
已於先佛種諸善根我於爾時在竹林中聞其音聲
卽起慈心諸女爾時見我來至迦毗羅城以水洗創
以藥塗之苦痛尋除耳鼻手足還復如本我時卽爲

略說法要悉令俱發阿耨多羅三藐三菩提心卽於
大愛道比丘尼所如法出家受具足戒善男子如來
爾時實不往至迦毗羅城以水洗創藥塗止苦善男
子當知皆是慈善根力令彼女人見如是事悲喜之
心亦復如是善男子以是義故菩薩摩訶薩修慈思
惟卽是真實非虛妄也善男子夫無量者不可思議
菩薩所行不可思議諸佛所行亦不可思議是大乘
典大涅槃經亦不可思議

南本大般涅槃經卷第十四

校譌

第三紙

二行含誤作
含從南改正

第十七紙

二行坐誤作
座從南改正

第二十紙

十五行於初誤作於切從南改正

第二十二紙

七行甚善南藏

作甚喜

第二十五紙

二十行往至誤作住至從南改正

音釋

熊

班麋切獸名

翅

施智切翼也

振

直庚切觸也

豌

烏官切豆名

麩

尸沼切乾

糧

徒合切

躄

魚記切

壅

七豔切

也

踰

徒合切

福建福寧州福安縣尹丹陽賀學易施貴刻此南本大般涅槃經第十四卷計字乙萬零九百箇該銀五兩六錢七分
銀山釋海亮對長洲徐普書句容潘繼德刻萬曆乙卯歲春二月徑山化城識

南本大般涅槃經卷第十五

北涼天竺三藏曇無讖譯梵

宋沙門慧嚴慧觀同謝靈運再治

梵行品第二十之二

復次善男子菩薩摩訶薩修慈悲喜已得住極愛一子之地善男子云何此地名曰極愛復名一子善男子譬如父母見子安隱心大歡喜菩薩摩訶薩住是地中亦復如是視諸衆生同於一子見修善者生大歡喜是故此地名曰極愛善男子譬如父母見子遇患心生苦惱憫之愁毒初無捨離菩薩摩訶薩住是

地中亦復如是見諸衆生爲煩惱病之所纏切心生
愁惱憂念如子身諸毛孔血皆流出是故此地名爲
一子善男子如人小時拾取土塊穢物瓦石枯骨木
枝置於口中父母見已恐爲其患左手捉頭右手挑
出菩薩摩訶薩住是地中亦復如是見諸衆生法身
未增或行身口意業不善菩薩見已則以智手拔之
令出不欲令彼流轉生死受諸苦惱是故此地復名
一子善男子譬如父母所愛之子捨而終亡父母愁
惱願與并命菩薩亦爾見一闍提墮於地獄亦願與
俱生地獄中何以故是一闍提若受苦時或生一念

改悔之心我卽當爲說種種法令彼得生一念善根
是故此地復名一子善男子譬如父母唯有一子其
子睡寤行住坐臥心常念之若有罪咎善言誘喻不
加其惡菩薩摩訶薩亦復如是見諸衆生若墮地獄
畜生餓鬼或入天中造作善惡心常念之初不放捨
若行諸惡終不生瞋以惡加之是故此地復名一子
迦葉菩薩白佛言世尊如佛所說其言祕密我今智
淺云何能解若諸菩薩住一子地能如是者云何如
來昔爲國王行菩薩道時斷絕爾所婆羅門命若得
此地則應護念若不得者復何因緣不墮地獄若使

等視一切衆生同於子想如羅睺羅何故復向提婆
達多說如是言癡人無羞食人涕唾令彼聞已生於
瞋恨起不善心出佛身血提婆達多造是惡已如來
復記當墮地獄一劫受罪世尊如是之言云何於義
不相違背世尊須菩提者住虛空地凡欲入城求乞
飲食要先觀人若有於已生嫌嫉心則止不行乃至
極飢猶不行乞何以故是須菩提常作是念我憶往
昔於福田所生一惡念由是因緣墮大地獄受種種
苦我今寧飢終日不食終不令彼於我起嫌墮於地
獄受諸苦惱復作是念若有衆生嫌我立者我當終

日端坐不起若有衆生嫌我坐者我當終日立不移
處行臥亦爾是須菩提護衆生故尚起是心何況菩
薩菩薩若得一子地者何緣如來出是麤言使諸衆
生起重惡心佛告迦葉汝今不應作如是難言佛如
來爲諸衆生作煩惱因緣善男子假使蟲豸能盡海
底如來終不爲諸衆生作煩惱因緣善男子假令大
地悉爲非色水爲堅相火爲冷相風爲住相三寶佛
性及以虛空作無常相如來終不爲諸衆生作煩惱
因緣善男子假使毀犯四重禁罪及一闡提謗正法
者現身得成十力無畏三十二相八十種好如來終

不爲諸衆生作煩惱因緣善男子假使聲聞辟支佛等常住不變如來終不爲諸衆生作煩惱因緣善男子假使十住諸菩薩等犯四重禁作一闍提誹謗正法如來終不爲諸衆生作煩惱因緣善男子假使一切無量衆生斷滅佛性如來究竟入般涅槃如來終不爲諸衆生作煩惱因緣善男子假令擲罨能繫縛風齒能破鐵爪壞須彌如來終不爲諸衆生作煩惱因緣寧與毒蛇同共一處內其兩手餓師子口佉陀羅炭用洗浴身不應發言如來世尊爲諸衆生作煩惱因緣善男子如來真實能爲衆生斷除煩惱終不

爲作煩惱因緣善男子如汝所言如來往昔殺婆羅門者善男子菩薩摩訶薩乃至螻子尚不故殺況婆羅門菩薩常作種種方便惠施衆生無量壽命善男子夫施食者則爲施命菩薩摩訶薩行檀波羅蜜時常施衆生無量壽命善男子修不殺戒得壽命長菩薩摩訶薩行尸波羅蜜時則爲施與一切衆生無量壽命善男子慎口無過得壽命長菩薩摩訶薩行羼提波羅蜜時常勸衆生莫生怨想推直於人引曲向已無所爭訟得壽命長是故菩薩行羼提波羅蜜時已施衆生無量壽命善男子精勤修善得壽命長善

薩摩訶薩行毗梨耶波羅蜜時常勸衆生勤修善法
衆生行已得無量壽是故菩薩行毗梨耶波羅蜜時
已施衆生無量壽命善男子修攝心者得壽命長善
薩摩訶薩行禪波羅蜜時勸諸衆生修平等心衆生
行已得壽命長是故菩薩行禪波羅蜜時已施衆生
無量壽命善男子於諸善法不放逸者得壽命長善
薩摩訶薩行般若波羅蜜時勸諸衆生於諸善法不
生放逸衆生行已以是因緣得壽命長是故菩薩行
般若波羅蜜時已施衆生無量壽命善男子以是義
故菩薩摩訶薩於諸衆生終無奪命善男子汝向所

問殺婆羅門時得是地不善男子我時已得以愛念
故斷其命根非惡心也善男子譬如父母唯有一子
愛之甚重犯官憲制是時父母以怖畏故若擯若殺
雖復擯殺無有惡心菩薩摩訶薩爲護正法亦復如
是若有衆生謗大乘者卽以鞭撻苦加治之或奪其
命欲令改往遵修善法菩薩意常作是思惟以何因
緣能令衆生發起信心隨其方便要當爲之諸婆羅
門命終之後生阿鼻地獄卽有三念一者自念我從
何處而來生此卽自知從人道中來二者自念我今
所生爲是何處卽便自知是阿鼻獄三者自念乘何

業緣而來生此卽便自知乘謗方等大乘經典不信
因緣爲國主所殺而來生此念是事已卽於大乘方
等經典生信敬心尋時命終生甘露鼓如來世界於
彼壽命具足十劫善男子以是義故我於往昔乃與
是人十劫壽命云何名殺善男子若人掘地刈草斫
樹斬截死尸罵詈鞭撻以是業緣墮地獄不迦葉菩
薩白佛言世尊如我解佛所說義者應墮地獄何以
故如佛昔爲聲聞說法汝諸比丘於諸草木莫生惡
心何以故一切衆生因惡心故墮於地獄爾時佛讚
迦葉菩薩善哉善哉如汝所說應善受持善男子若

因惡心墮地獄者菩薩爾時實無惡心何以故菩薩
摩訶薩於一切衆生乃至蟲豸悉生憐憫利益心故
所以者何善知因緣諸方便故以方便力欲令衆生
種諸善根善男子以是義故我於爾時以善方便雖
奪其命而非惡心善男子婆羅門法若殺豸子滿足
十車無有罪報蟲豸貓子師子虎狼熊羆諸惡
蟲獸及餘能爲衆生害者殺滿十車鬼神羅刹拘槃
荼迦羅富單那顛狂乾枯諸鬼神等能爲衆生作燒
害者斬奪其命悉無罪報若殺惡人則有罪報殺已
不悔則墮餓鬼若能懺悔三日斷食其罪消滅無有

遺餘若害和尚及其父母女人及牛無數千年在地獄中善男子佛及菩薩知殺有三謂下中上下者瞪子乃至一切畜生唯除菩薩示現生者善男子菩薩摩訶薩以願因緣示受畜生是名下殺以下殺因緣墮於地獄畜生餓鬼具受下苦何以故是諸畜生有微善根是故殺者具受罪報是名下殺中殺者從凡夫人至阿那含是名爲中以是業因墮於地獄畜生餓鬼具受中苦是名中殺上殺者父母乃至阿羅漢辟支佛畢定菩薩是名爲上以是業因墮於阿鼻大地獄中具受上苦是名上殺善男子若有能殺一闍

提者則不墮此三種殺中善男子彼諸婆羅門等一切皆是一闍提也譬如掘地刈草斫樹斬截死尸罵詈鞭撻無有罪報殺一闍提亦復如是無有罪報何以故諸婆羅門乃至無有信等五法是故雖殺不墮地獄善男子汝上所言如來何故罵提婆達多癡人食唾汝亦不應作如是難何以故諸佛世尊凡所發言不可思議善男子或有實語爲世所愛非時非法不爲利益如是之言我終不說善男子或復有言麤獷虛妄非時非法聞者不愛不能利益我亦不說善男子若有語言雖復麤獷真實不虛是時是法能爲

一切衆生利益聞雖不悅我要說之何以故諸佛世
尊應正徧知方便故善男子如我一時遊彼曠野
聚落叢樹在其林下有一鬼神卽名曠野純食肉血
多殺衆生復於其聚日食一人善男子我於爾時爲
彼鬼神廣說法要然彼暴惡愚癡無智不受教法我
卽化身爲大力鬼動其宮殿令不安所彼鬼于時將
其眷屬出其宮殿欲來拒逆鬼見我時卽失心念惶
怖躑地迷悶斷絕猶如死人我以慈憫手摩其身卽
還起坐作如是言快哉今日還得身命是大神王具
大威德有慈憫心赦我愆咎卽於我所生善信心我

卽還復如來之身復更爲說種種法要令彼鬼神受
不殺戒卽於是日曠野村中有一長者次應當死村
人已送付彼鬼神鬼神得已卽以施我我既受已便
爲長者更立名字名手長者爾時彼鬼卽白我言世
尊我及眷屬唯仰血肉以自存活今已受戒當何資
立我卽答言從今當勅聲聞弟子隨有修行佛法之
處悉當令其施汝飲食善男子以是因緣爲諸比丘
制如是戒汝等從今常當施彼曠野鬼食若有住處
不能施者當知是輩非我弟子卽是天魔徒黨眷屬
善男子如來爲欲調伏衆生故示如是種種方便非

故令彼生怖畏也善男子我亦以木打護法鬼又於
一時在一山上推羊頭鬼令墮山下復於樹頭撲護
彌猴鬼令護財象見五師子使金剛神怖薩遮尼捷
亦以針刺箭毛鬼身雖作如是亦不令彼諸鬼神等
有殘滅者直欲令彼安住正法故示如是種種方便
善男子我於爾時實不罵辱提婆達多提婆達多亦
不愚癡食人涕唾亦復不生惡趣之中阿鼻地獄受
罪一劫亦不壞僧出佛身血亦不違犯四重之罪誹
謗正法大乘經典非一闍提亦非聲聞辟支佛也善
男子提婆達者實非聲聞緣覺境界唯是諸佛之所

知見善男子是故汝今不應難言如來何緣訶責罵
辱提婆達也汝於諸佛所有境界不應如是生於疑
網迦葉菩薩白佛言世尊譬如甘蔗數數煎煮得種
種味我亦如是從佛數聞多得法味所謂出家味離
欲味寂滅味道味世尊譬如真金數數燒打鎔銷鍊
治轉更明淨調和柔軟光色微妙其價難量然後乃
爲人天寶重世尊如來亦爾鄭重諮問則得聞見甚
深之義令深行者受持奉修無量衆生發阿耨多羅
三藐三菩提心然後爲諸人天所宗恭敬供養爾時
佛讚迦葉菩薩善哉善哉菩薩摩訶薩爲欲利益諸

衆生故諮啓如來如是深義善男子以是義故我隨
汝意說大乘方等甚深祕法所謂極愛如一子地迦
葉菩薩白佛言世尊若諸菩薩修慈悲喜得一子地
者修捨心時復得何地佛言善哉善哉善男子汝善
知時知我欲說汝則諮問菩薩摩訶薩修捨心時則
得住於空平等地如須菩提善男子菩薩摩訶薩住
空平等地則不見有父母兄弟姊妹兒息親族知識
怨親中人乃至不見陰界諸入衆生壽命善男子譬
如虛空無有父母兄弟妻子乃至無有衆生壽命一
切諸法亦復如是無有父母乃至壽命菩薩摩訶薩

見一切法亦復如是其心平等如彼虛空何以故善
能修習諸空法故迦葉菩薩白佛言世尊云何名空
善男子空者所謂內空外空內外空有爲空無爲空
無始空性空無所有空第一義空空大空菩薩摩
訶薩云何觀於內空是菩薩摩訶薩觀內法空是內
法空謂無父母怨親中人衆生壽命常樂我淨如來
法僧所有財物是內法中雖有佛性而是佛性非內
非外所以者何佛性常住無變易故是名菩薩摩訶
薩觀於內空外空者亦復如是無有內法內外空者
亦復如是善男子唯有如來法僧佛性不在二空何

以故如是四法常樂我淨是故四法不名爲空是名
內外俱空善男子有爲空者有爲之法悉皆是空所
謂內空外空內外空常樂我淨空衆生壽命如來法
僧第一義空是中佛性非有爲法是故佛性非有爲
法空是名有爲空善男子云何菩薩摩訶薩觀無爲
空是無爲法悉皆是空所謂無常苦不淨無我陰界
入衆生壽命相有爲有漏內法外法無爲法中佛等
四法非有爲非無爲性是善故非無爲性常住故非
有爲是名菩薩觀無爲空云何菩薩摩訶薩觀無始
空是菩薩摩訶薩見生死無始皆悉空寂所謂空者

常樂我淨皆悉空寂無有變易衆生壽命三寶佛性
及無爲法是名菩薩觀無始空云何菩薩觀於性空
是菩薩摩訶薩觀一切法本性皆空謂陰界入常無
常苦樂淨不淨我無我觀如是等一切諸法不見本
性是名菩薩摩訶薩觀於性空云何菩薩摩訶薩觀
無所有空如人無子言舍宅空畢竟觀空無有親愛
愚癡之人言諸方空貧窮之人言一切空如是所計
或空或非空菩薩觀時如貧窮人一切皆空是名菩
薩摩訶薩觀無所有空云何菩薩摩訶薩觀第一義
空善男子菩薩摩訶薩觀第一義時是眼生時無所

從來及其滅時去無所至本無今有已有還無推其實性無眼無主如眼無性一切諸法亦復如何等名爲第一義空有業有報不見作者如是空法名第一義空是名菩薩摩訶薩觀第一義空云何菩薩摩訶薩觀於空空是空空中乃是聲聞辟支佛等所迷沒處善男子是有是無是名空空是是非是是名空空善男子十住菩薩尚於是中通達少分猶如微塵況復餘人善男子如是空空亦不同於聲聞所得空空三昧是名菩薩觀於空空善男子云何菩薩摩訶薩觀於大空善男子言大空者謂般若波羅蜜是名

大空善男子菩薩摩訶薩得如是空門則得住於虛空等地善男子我今於是大衆之中說如是等諸空義時有十恒河沙菩薩摩訶薩卽得住於虛空等地善男子菩薩摩訶薩住是地已於一切法中無有滯闕繫縛拘執心無迷悶以是義故名虛空等地善男子譬如虛空於可愛色不生貪著不愛色中不生瞋恚菩薩摩訶薩住是地中亦復如是於好惡色心無貪恚善男子譬如虛空廣大無對悉能容受一切諸物菩薩摩訶薩住是地中亦復如是廣大無對悉能容受一切諸法以是義故復得名爲虛空等地善男

子菩薩摩訶薩住是地中於一切法亦見亦知若行若緣若性若相若因若緣若衆生心若根若禪定若乘若善知識若持禁戒若所施如是等法一切知見復次善男子菩薩摩訶薩住是地中知而不見云何爲知知自餓法投淵赴火自墜高巖常翹一脚五熱炙身常棄灰土棘刺編椽樹葉惡草牛糞之上衣麤麻衣塚間所臥糞埽氈毼欽婆羅衣麀鹿皮革芻草衣裳茹菜啖果藕根油滓牛糞根果若行乞食限從一家主若言無即便捨去設復還喚終不迴顧不食鹽肉五種牛味常所飲服糖汁沸湯受持牛戒雞狗

雞戒以灰塗身長髮爲相以羊祠天先呪後殺四月事火七日服風百千億華供養諸天諸所欲願因此成就如是等法能爲無上解脫因者無有是處是名爲知云何不見菩薩摩訶薩不見一人行如是法得正解脫是名不見復次善男子菩薩摩訶薩亦見亦知何等爲見見諸衆生行是邪法必墮地獄是名爲見云何爲知知諸衆生從地獄出生於人中若能修行檀波羅蜜乃至具足諸波羅蜜是人必能得入正解脫是名爲知復次善男子菩薩摩訶薩復有亦見亦知云何爲見見常無常苦樂淨不淨我無我是名

爲見云何爲知知諸如來定不畢竟入於涅槃知如
來身金剛無壞非是煩惱所成就身又非臭穢腐敗
之身亦復能知一切衆生悉有佛性是名爲知復次
善男子菩薩摩訶薩復有亦知亦見云何爲知知是
衆生心信成就知是衆生求於大乘是人順流是人
逆流是人正住知是衆生已到彼岸順流者謂凡夫
人逆流者從須陀洹乃至緣覺正住者諸菩薩等到
彼岸者所謂如來應供正徧知是名爲知云何爲見
菩薩摩訶薩住於大乘大涅槃契典修梵行心以淨天
眼見諸衆生造身口意三業不善墮於地獄畜生餓

鬼見諸衆生修善業者命終當生天上人中見諸衆
生從闇入闇有諸衆生從闇入明有諸衆生從明入
闇有諸衆生從明入明是名爲見復次善男子菩薩
摩訶薩復有亦知亦見菩薩摩訶薩知諸衆生修身
修戒修心修慧是人今世惡業成就或因貪欲瞋恚
愚癡是業必應地獄受報是人直以修身修戒修心
修慧現世輕受不墮地獄云何是業能得現報懺悔
發露所有諸惡既悔之後更不敢作慙愧成就故供
養三寶故常自訶責故是人以是善業因緣不墮地
獄現世受報所謂頭痛目痛腹痛背痛橫羅死殃訶

責罵辱鞭杖閉繫飢餓困苦受如是等現世輕報是
名爲知云何爲見菩薩摩訶薩見如是人不能修習
身戒心慧造少惡業此業因緣應現受報是人少惡
不能懺悔不自訶責不生慙愧無有怖懼是業增長
地獄受報是名爲見復有知而不見云何知而不見
知諸衆生皆有佛性爲諸煩惱之所覆蔽不能得見
是名知而不見復有知而少見十住菩薩摩訶薩等
知諸衆生皆有佛性見不明了猶如闇夜所見不了
復有亦見亦知所謂諸佛如來亦見亦知復有亦見
亦知不見不知亦見亦知者所謂世間文字言語男

女車乘餅盆舍宅城邑衣裳飲食山河園林衆生壽
命是名亦見亦知云何不見不知聖人所有微密之
語無有男女乃至園林是名不見不知復有知而不
見知所惠施知所供處知於受者知因果報是名爲
知云何不見不見所施供處受者及以果報是名不
見菩薩摩訶薩知有八種卽是如來五眼所知迦葉
菩薩白佛言世尊菩薩摩訶薩能如是知得何等利
佛言善男子菩薩摩訶薩能如是知得四無闕法無
闕義無闕詞無闕樂說無闕法無闕者知一切法及
法名字義無闕者知一切法所有諸義能隨諸法所

立名字而爲作義詞無闕者隨字論正音論闡陀論
世辯論樂說無闕者所謂菩薩摩訶薩凡所演說無
有障闕不可動轉無所畏懼難可摧伏善男子是名
菩薩能如是見知卽得如是四無闕智復次善男子
法無闕者菩薩摩訶薩徧知聲聞緣覺菩薩諸佛之
法義無闕者乘雖有三知其歸一終不謂有差別之
相詞無闕者菩薩摩訶薩於一法中作種種名經無
量劫說不可盡聲聞緣覺能作是說無有是處樂說
無闕者菩薩摩訶薩於無量劫爲諸衆生演說諸法
若名若義種種異說不可窮盡復次善男子法無闕

者菩薩摩訶薩雖知諸法而不取著義無闕者菩薩
摩訶薩雖知諸義而不取著詞無闕者菩薩摩訶薩
雖知名字而亦不著樂說無闕者菩薩摩訶薩雖知
樂說如是最上而亦不著何以故善男子若取著者
不名菩薩迦葉菩薩復白佛言世尊若不取著則不
知法若知法者則是取著若知不著則無所知云何
如來說言知法而不取著佛言善男子夫取著者不
名無闕無所取著乃名無闕善男子是故一切諸菩
薩等有取著者則無無闕若無無闕不名菩薩當知
是人名爲凡夫何故取著名爲凡夫一切凡夫取著

於色乃至著識以著色故則生貪心生貪心故爲色
繫縛乃至爲識之所繫縛以繫縛故則不得免生老
病死憂悲大苦一切煩惱是故取著名爲凡夫以是
義故一切凡夫無四無闕善男子菩薩摩訶薩已於
無量阿僧祇劫知見法相以知見故則知其義以見
法相及知義故而於色中不生繫著乃至識中亦復
如是以不著故菩薩於色不生貪心乃至識中亦不
生貪以無貪故則不爲色之所繫縛乃至不爲識之
所縛以不縛故則能得脫生老病死憂悲大苦一切
煩惱以是義故一切菩薩得四無闕善男子以是因

緣我爲弟子十二部中說繫著者名爲魔縛若不著
者則脫魔縛譬如世間有罪之人爲王所縛無罪之
人王不能縛菩薩摩訶薩亦復如是有繫著者爲魔
所縛無繫著者魔不能縛以是義故菩薩摩訶薩而
無所著復次善男子法無闕者菩薩摩訶薩善知字
持而不忘失所謂持者如地如山如眼如雲如人如
母一切諸法亦復如是義無闕者菩薩雖知諸法名
字而不知義得義無闕則知其義云何知義謂地持
者如地普持一切衆生及非衆生以是義故名地爲
持善男子謂山持者菩薩摩訶薩作是思惟以何義

故名山爲持山能持地令無傾動是故名持何名眼
持眼能持光故名爲持何名雲持雲名龍氣龍氣持
水故名爲持何名人持人能持法及以非法故名爲
持何名母持母能持子故名爲持菩薩摩訶薩知一
切法名字句義亦復如是詞無闕者菩薩摩訶薩以
種種詞演說一義亦無有義猶如男女舍宅車乘衆
生等名何故無義善男子夫義者乃是菩薩諸佛境
界詞者凡夫境界以知義故得詞無闕樂說無闕者
菩薩摩訶薩知詞知義故於無量阿僧祇劫說詞說
義而不可盡是名樂說無闕善男子菩薩於無量無

邊阿僧祇劫修行世諦以修行故知法無闕復於無
量阿僧祇劫修第一義諦故得義無闕亦於無量阿
僧祇劫習毗伽羅論故得詞無闕亦於無量阿僧祇
劫修習說世辯論故得樂說無闕善男子聲聞緣覺
若有得是四無闕者無有是處善男子九部經中我
說聲聞緣覺之人有四無闕聲聞緣覺真實無有何
以故菩薩摩訶薩爲度衆生故修如是四無闕智緣
覺之人修寂滅法志樂獨處若化衆生但現神通終
日默然無所宣說云何當有四無闕智何故默然而
無所說緣覺不能說法度人令得煥法頂法忍法世

第一法須陀洹斯陀舍阿那舍阿羅漢辟支佛菩薩
摩訶薩不能令人發阿耨多羅三藐三菩提心何以
故善男子緣覺出世世間無有九部經典是故緣覺
無詞無闕樂說無闕善男子緣覺之人雖知諸法無
法無闕何以故法無闕者名爲知字緣覺之人雖知
文字無字無闕何以故不知常住二字故是故緣覺
不得法無闕雖知於義無義無闕真知義者知諸衆
生悉有佛性佛性義者名爲阿耨多羅三藐三菩提
以是義故緣覺之人不得義無闕是故緣覺一切無
有四無闕智云何聲聞無四無闕聲聞之人無有三

種善巧方便何等爲三一者必須軟語然後受法二
者必須麤語然後受化三者不軟不麤然後受化聲
聞之人無此三故無四無闕復次聲聞緣覺不能畢
竟知詞知義無自在智知於境界無有十力四無所
畏不能畢竟度彼十二因緣大海不能善知衆生諸
根利鈍差別未能永斷三諦疑心不知衆生種種諸
心所緣境界不能善說第一義空是故二乘無四無
闕迦葉菩薩白佛言世尊若諸聲聞緣覺之人一切
無有四無闕者云何世尊說舍利弗智慧第一大目
捷連神通第一摩訶拘絺羅四無闕第一若其無者

如來何故作如是說爾時世尊讚迦葉言善哉善哉善男子譬如恒河有無量水辛頭大河水亦無量博又大河水亦無量私陀大河水亦無量阿耨達池水亦無量大海之中水亦無量如是諸水雖同無量然其多少其實不等聲聞緣覺及諸菩薩四無閼智亦復如是善男子若說等者無有是處善男子我爲凡夫說摩訶拘絺羅四無閼智爲最第一汝所問者其義如是善男子聲聞之人或有得一或有得二若具足四無有是處迦葉白佛言世尊如佛上說梵行品中菩薩知見得四無閼者菩薩知見則無所得亦無

有心言無所得世尊是菩薩摩訶薩實無所得若使菩薩心有得者則非菩薩名爲凡夫云何如來說言菩薩而有所得佛言善男子善哉善哉我將欲說而汝復問善男子菩薩摩訶薩實無所得無所得者名四無閼善男子以何義故無所得者名爲無閼若有得者則名爲閼有障閼者名四顛倒善男子菩薩摩訶薩無四倒故故得無閼是故菩薩名無所得復次善男子無所得者則名爲慧菩薩摩訶薩得是慧故名無所得有所得者名爲無明菩薩永斷無明闇故故無所得是故菩薩名無所得復次善男子無所得

者名大涅槃菩薩摩訶薩安住如是大涅槃中不見一切諸法性相是故菩薩名無所得有所得者名二十五有菩薩永斷二十五有得大涅槃是故菩薩名無所得復次善男子無所得者名爲大乘菩薩摩訶薩不住諸法故得大乘是故菩薩名無所得有所得者名爲聲聞辟支佛道菩薩永斷二乘之道故得佛道是故菩薩名無所得復次善男子無所得者名方等經菩薩讀誦如是經故得大涅槃是故菩薩名無所得有所得者名十一部經菩薩不修純說方等大乘經典是故菩薩名無所得復次善男子無所有者

名爲虛空世間無物名爲虛空菩薩得是虛空三昧無所見故是故菩薩名無所得有所得者名生死輪一切凡夫輪迴生死故有所見菩薩永斷一切生死是故菩薩名無所得復次善男子無所得者名常樂我淨菩薩摩訶薩見佛性故得常樂我淨是故菩薩名無所得有所得者名無常無樂無我無淨菩薩摩訶薩斷是無常無樂無我無淨是故菩薩名無所得復次善男子無所得者名第一義空菩薩摩訶薩觀第一義空悉無所見是故菩薩名無所得有所得者名爲五見菩薩永斷是五見故得第一義空是故菩

薩名無所得復次善男子無所得者名爲阿耨多羅
三藐三菩提菩薩摩訶薩得阿耨多羅三藐三菩提
時悉無所見是故菩薩名無所得有所得者名聲聞
緣覺菩提菩薩永斷二乘菩提是故菩薩名無所得
善男子汝之所問亦無所得我之所說亦無所得若
說有得是魔眷屬非我弟子迦葉白佛言世尊爲我
說是菩薩無所得時無量衆生斷有相心以是事故
我不敢啓無所得義令如是等無量衆生離魔眷屬
爲佛弟子迦葉菩薩白佛言世尊如來上爲純陀說
偈

本有今無

本無今有

三世有法

無有是處

世尊是義云何佛言善男子我爲化度諸衆生故而
作是說亦爲聲聞辟支佛故而作是說亦爲文殊師
利法王子故而作是說不但正爲純陀一人說是偈
也時文殊師利將欲問我我知其心而爲說之我既
說已文殊師利卽得解了迦葉菩薩言世尊如文殊
等詎有幾人能了是義惟願如來更爲大衆廣分別
說善男子諦聽諦聽今當爲汝重敷演之言本有者
我昔本有無量煩惱以煩惱故現在無有大般涅槃

言本無者本無般若波羅蜜以無般若波羅蜜故現在具有諸煩惱結若有沙門若婆羅門若天若魔若梵若人說言如來去來現在有煩惱者無有是處復次善男子言本有者我昔本有父母和合之身是故現在無有金剛微妙之身言本無者我身本無三十二相八十種好以本無有三十二相八十種好故現在具有四百四病若有沙門若婆羅門若天若魔若梵若人說言如來去來現在有病苦者無有是處復次善男子言本有者我昔本有無常無樂無我無淨以有無常無我無樂無淨故現在無有阿耨多羅三

藐三菩提言本無者本不見佛性以不見故無常樂我淨若有沙門若婆羅門若天若魔若梵若人說言如來去來現在無常樂我淨者無有是處復次善男子言本有者本有凡夫修苦行心謂得阿耨多羅三藐三菩提以是事故現在不能破壞四魔言本無者本無六波羅蜜以無六波羅蜜故修行凡夫苦行之心謂得阿耨多羅三藐三菩提若有沙門若婆羅門若天若魔若梵若人說言如來去來現在有苦行者無有是處復次善男子言本有者我昔本有雜食之身以有食身故現在無有無邊之身言本無者本無

三十七助道之法以無三十七助道法故現在具有雜食之身若有沙門若婆羅門若天若魔若梵若人說言如來去來現在有雜食身者無有是處復次善男子言本有者我昔本有一切法中取著之心以是事故現在無有畢竟空定言本無者我本無有中道實義以無中道真實義故於一切法則有著心若有沙門若婆羅門若天若魔若梵若人說言如來去來現在說一切法是有相者無有是處復次善男子言本有者我初得阿耨多羅三藐三菩提時有諸鈍根聲聞弟子以有鈍根聲聞弟子故不得演說一乘之

實言本無者本無利根人中象王迦葉菩薩等以無利根迦葉等故隨宜方便開示三乘若有沙門若婆羅門若天若魔若梵若人說言如來去來現在畢竟演說三乘法者無有是處復次善男子言本有者我本說言却後三月於娑羅雙樹當般涅槃是故現在不得演說大方等典大般涅槃言本無者本昔無有文殊師利大菩薩等以無有故現在說言如來無常若有沙門若婆羅門若天若魔若梵若人說言如來去來現在是無常者無有是處善男子如來普爲諸衆生故雖知諸法說言不知雖見諸法說言不見有

相之法說言無相無相之法說言有相實有無常說
言有常實有有常說言無常我樂淨等亦復如是三
乘之法說言一乘一乘之法隨宜說三略相說廣廣
相說略四重之法說偷蘭遮偷蘭遮法說爲四重犯
說非犯非犯說犯輕罪說重重罪說輕何以故如來
明見衆生根故善男子如來雖作是說終無虛妄何
以故虛妄之語卽是罪過如來悉斷一切罪過云何
當有虛妄語耶善男子如來雖無虛妄之言若知衆
生因虛妄說得法利者隨宜方便則爲說之善男子
一切世諦若於如來卽是第一義諦何以故諸佛世

尊爲第一義故說於世諦亦令衆生得第一義諦若
使衆生不得如是第一義諦者諸佛終不宣說世諦
善男子如來有時演說世諦衆生謂佛說第一義諦
有時演說第一義諦衆生謂佛說於世諦是則諸佛
甚深境界非是聲聞緣覺所知善男子是故汝先不
應難言菩薩摩訶薩無所得也菩薩常得第一義諦
云何難言無所得耶迦葉復言世尊第一義諦亦名
爲道亦名菩提亦名涅槃若有菩薩言有得道菩提
涅槃卽是無常何以故法若常者則不可得猶如虛
空誰有得者世尊如世間物本無今有名爲無常道

亦如是道若可得則名無常法若常者無得無生猶如佛性無得無生世尊夫道者非色非不色不長不短非高非下非生非滅非赤非白非青非黃非有非無云何如來說言可得菩提涅槃亦復如是佛言如是如是善男子道有二種一者常二者無常菩提之相亦有二種一者常二者無常涅槃亦爾外道道者名爲無常內道道者名之爲常聲聞緣覺所有菩提名爲無常菩薩諸佛所有菩提名之爲常外解脫者名爲無常內解脫者名之爲常善男子道與菩提及以涅槃悉名爲常一切衆生常爲無量煩惱所覆無

慧眼故不能得見而諸衆生爲欲見故修戒定慧以修行故見道菩提及以涅槃是名菩薩得道菩提涅槃道之性相實不生滅以是義故不可捉持善男子道者雖無色像可見稱量可知而實有用善男子如衆生心雖非是色非長非短非麤非細非縛非解非是見法而亦是有以是義故我爲須達說言長者心爲城主若不護心則不護身口若護心者則護身口以不善護是身口故令諸衆生到三惡趣護身口者則令衆生得人天涅槃得名真實不得者名不真實善男子道與菩提及以涅槃亦復如是亦有亦常若

其無者云何能斷一切煩惱以其有故一切菩薩了
了見知善男子見有二種一相貌見二了了見云何
相貌見如遠見烟名爲見火實不見火雖不見火亦
非虛妄見空中鶴便言見水雖不見水亦非虛妄如
見華葉便言見根雖不見根亦非虛妄如人遙見籬
間牛角便言見牛雖不見牛亦非虛妄如見女人懷
妊便言見欲雖不見欲亦非虛妄又如見樹生葉便
言見水雖不見水亦非虛妄又如見雲便言見雨雖
不見雨亦非虛妄如見身業及以口業便言見心雖
不見心亦非虛妄是名相貌見云何了了見如眼見

色善男子如人眼根清淨不壞自觀掌中阿摩勒果
菩薩了了見道菩提涅槃亦復如是雖如是見初無
見相善男子以是因緣我於往昔告舍利弗一切世
間若有沙門若婆羅門若天若魔若梵若人所不知
不見不覺唯有如來悉知見覺及諸菩薩亦復如是
舍利弗若諸世間所知見覺我與菩薩亦知見覺世
間衆生所知見覺便自說言我知見覺舍利弗如來
一切悉知見覺亦不言我知見覺一切菩薩亦復
如是何以故若使如來作知見覺相當知是則非佛

世尊名爲凡夫菩薩亦爾

南本大般涅槃經卷第十五

音釋

蟲背

蟲無分切
背即委切

擯

必刃切
斥逐也

撻

他達切
打也

晉

力置切
斥曰晉

蟲

莫耕切
蚊也

滯

滯直例切
五既切與礙同

翹

祈堯切
舉也

麤

麤力朱切
麤麤也

啖

徒感切
食也

福建福寧州福安縣尹丹陽賀學易施費刻此

同本大般涅槃經第十五卷 計字乙萬乙千

銀山釋海亮對長洲徐普書土元陶文汜刻
萬曆乙卯歲春三月徑山化城識



ノ
七
七

